

萬有文庫

第二集七百種

王雲五主編

明詩紀事

(十)

陳 和 編

商務印書館發行

明詩紀事

(十)

陳田輯

國學基本叢書

明詩紀事卷七

丙籤

謝遷一首

遷字子喬。餘姚人。成化乙未第一人及第。授修撰。歷諭德。庶子。少詹。兼侍講學士。入閣參預機務。進詹事。擢兵部尚書。東閣大學士。加太子少保。太子太保。改禮部尚書。進武英殿大學士。少傅。兼太子太傅。請誅劉瑾。忤旨致仕。除名。瑾誅復職。再致仕。起戶部尚書。兼謹身殿大學士。贈太傅。諡文正。有歸田稿八卷。

四庫總目。謝遷文集全稿。嘉靖中倭亂被燬。歸田稿八卷。乃其致仕以後。及再召時所作也。集中奏疏。類多晚年陳謝之作。凡在朝時。嘉謨讜論。均已無存。卽史所稱。請罷選妃嬪。禁約內官諸疏。亦散失。然遷當歸里以後。正劉瑾焦芳等挾怨修卻。日在危疑震撼之中。而所作詩文。大抵詞旨和平。惟眷眷寄江湖魏闕之思。老臣憂國。退不忘君。讀此一編。已足以知其忠惓矣。王謦震澤紀聞。成化弘治間。翰林聲望最重者。吳寬。次則謝遷。兩人皆狀元及第。儀幹修整。寬溫粹含宏。遷明暢亮直。寬詩文俱有古意。遷亦亞之。故一時並有公輔之望。遷入內閣十餘年。號能持正。不失爲賢相。時劉健爲首相。遷數言寬當入閣。健曰。待我去用之。他日又以爲言。又曰。待我去用之。遷爭之不得。至聲色俱厲。健但笑而已。

皇甫庸近峯聞略。弘治乙丑。大學士木齋謝公。乞致仕。薦吳文定。王文恪。二公以代己。言極懇至。一時恬讓之風。感動中外。

田按木齋以忤劉瑾致仕。瑾意叵測。人皆危之。木齋曰。天佑皇明。我當無他。不見劉元城之事乎。處之裕如。日與客圍棋。賦詩。可謂雅量。

習靜

一塵不到水邊亭。掃石焚香晝掩扃。方沼萍開魚掉尾。高崖松動鶴梳翎。窗臨絕澗涵虛白。山隔重湖送遠青。更是晚來羣動息。空庭仰臥數流星。

王鏊十二首

鏊字濟之。吳人。成化乙未。第二人及第。授編修。歷侍講。諭德。少詹。兼侍講學士。擢吏部侍郎。入閣。參預機務。進戶部尚書。文淵閣大學士。加少傅。兼太子太傅。贈太傅。諡文恪。有震澤集三十卷。烏衣佳話。吳中落花詩。自沈石田起一詠三十律。一時詩人倡和者斐然。至有和韻者。未免東坡搗辛之謂。王文恪公詠落花絕句云。魚鱗滴地雪斑斑。蜨怨蜂愁鵲慘顏。只有道人心似水。花開花落總如閒。觀此詩。一洗山林陳腐之陋。奚以多爲。田按文恪以文章名一世。集中七言律絕。格調風致。竟爾不凡。

贈梁都憲巡撫四川

赤甲白鹽雄作鎮。鐵冠繡斧凜先聲。雪山已爲來時重。黑水應聞去後清。殿上位虛中執法。邊頭人散小團營。憑誰說與蘇明允。畫像無煩記姓名。

送吳編修克溫歸省宜興

玉堂退直幾相從。茗盃薰鑪坐晏春。遠別芳洲生杜若。清詞秋水出芙蓉。交情淡愛周公瑾。宦況輕懷邴曼容。問罷起居還就道。渭陽雲樹思重重。

送同年俞副使之四川兵備

控帶西南坐上遊。安危須共主分憂。蜀人到老懷張詠。邊計從前仗武侯。地遠烏蠻耕更早。天高白帝鎮橫秋。雪山不見南來雁。書寄同年幾日收。

送僧方冊歸善權寺

荆溪東望夢崢嶸。欲訪坡翁惜未能。今日上人飛錫去。西風誰與攝衣登。洞谿玉帶追仙李。泉落銅棺漱古藤。他日三生堂外見。山人應訝我來曾。

姪延學作亭湖上

幾醉池亭雪色醺。近聞亭子勢尤高。白鷗不避新翻曲。黃鳥時窺舊賜袍。波影半簾雲滉漾。山嵐四面畫周遭。我來湖上題詩句。禿盡山中秋兔毫。

望陽山

青谿欲盡轉逶迤。臥對陽山舟自移。聞有高人何處住。白雲紅樹影離離。

春日山行

風輓波平一鑑開。湖山重疊見樓臺。萬株晴雪懸崖裏。只爲梅花也合來。此詩亦見文森中丞集。

丹陽孫思和訪余于洞庭詩以送之

玉柱金庭未易尋。飽看七十二瑤岑。太湖多少閒風月。歸對金焦盡日吟。

答胡太守孝思次韻

太湖三萬六千頃。七十二峯煙雨中。畫船五宿澄波裏。千古風流始屬公。

王弼七首

弼字存敬。黃巖人。成化乙未進士。除溧水知縣。遷刑部郎中。出爲興化知府。有南郭集。

林俊見素集。南郭逸才橫發。壯思雄飛。出入韋柳蘇黃。宋筋唐響。通其正變。

三台詩錄。南郭詩才思豪逸。後師山谷多拗句。造思頗苦。自謂不如是。不足以遠甜俗一派。

田按南郭治興化。稱循吏。詩如同甘諫果。正味森森。

二馬圖爲陳明之題

壯哉陳明之。有此兩玉驄。一驄色作葡萄錦。一驄雪尾雲爲鬃。咄哉明之此非畫。兩胡碧眼睛相射。手中綠繩三尺捶。人馬意態俱閑暇。燕郊二月沙草春。淡風豔日開煙塵。兩龍浴罷桃花水。迴視八極生精神。十年侍朝未央殿。西北貢馬尋常見。驚駘豈有仗下材。空勞萬乘臨軒看。有如此圖誠不多。舉足萬里無

山河試令放馳九折坂。定與飛鶴爭先過。神物不受人間役。冥冥天意應相屬。明朝卷軸送還君。莫使春雷驚我屋。

賞梨花用東坡梅花韻

缺月挂在城南村。百花黯慘無精魂。開眼東闌一株雪。清光回晝寒燈昏。牽衣昨夜走相覓。風物雖好非吾園。盤龍小椀破春夢。主人顏色如花溫。歸來展轉久不寐。縞衣月淡扶桑暾。今宵又作省中宿。想思復欲來呼門。露華颼颼鬢腳冷。主人不出花無言。明當掃拂花下石。我欲往置雙清尊。

神樂道院分詠枸杞

簇簇紅霜映石壇。高標留借野人看。風光牽挽藤三尺。秋色扶持竹半竿。本草性涼消內熱。仙家味苦帶儒酸。向來肺爲憂時渴。欲臥離根待一餐。

次韻陳一夔清明感懷

公詩常切故園悲。不耐紅塵帽底吹。上巳風光依例好。中年情況自家知。勝遊準擬隨輕策。貧具惟應有伏雌。明日城東濯纓去。平泉石上送青時。

四月十四日德州官廨見薔薇花盛開有感明日道間又聞鶯聲宛轉在樹陰中不勝淒惋賦此自遣

昨朝苦被薔薇惱。今日重聞黃栗留。飄轉客身殊未定。闌珊春事不勝愁。青林氣重迷征旆。迴野風銛憶故裘。傳節漸更家漸遠。無憑歸夢付東流。

便面

竹裏幽亭是我家。門前白水浸平沙。釣船順放中流下。袖手船頭看浪花。

彭綱一首

綱字性仁。清江人。成化乙未進士。授兵部主事。遷員外。出知汝州。擢僉事。遷雲南提學副使。有雲田集。

詠刺桐花

樹頭樹底花楚楚。風吹密葉翠翩翩。露出幾隻紅鸚鵡。

升菴集。古有三句之詩。意足詞贍。盤屈於二十一字之中。最爲難工。徧檢前賢詩。不過四五首而已。岑之敬當壇曲云。明月二八照花新。當壇十五晚留賓。四眸□萬橫自陳。最爲絕唱。唐傳奇。無名氏春詞云。楊柳裊裊隨風急。西樓美人春夢中。繡簾斜捲千條入。宋謝皋羽寄鄧牧心云。杜鵑花開桑葉齊。戴勝辛生藥草肥。九鎖山人歸未歸。洪武中。廖天驥寄山中友人云。桂樹蒼蒼月如霧。山中故人讀書處。白雲溼衣不可去。又古步虛詞云。三十六天高太清。元君夫人踞雲語。吟風颯颯吹玉笙。近日雲南提學彭綱詠刺桐花云云。亦風韻可愛也。刺桐花。雲南名爲鸚哥花。花形酷似之。彭公此詩本四句。命吏寫刻於匾。遺其一句。復誦之。自覺意足。乃不更改。余聞之。晉甯待御唐池南云。

徐源一首

源字仲山，長洲人。成化乙未進士，授工部主事，遷兵部郎中，出爲廣東參政，遷湖廣布政使，擢右副都御史，巡撫山東，有瓜涇集二卷。

笠澤

娟娟月一川，杳杳笛三弄。釣艇入蘆花，驚破鳬鷺夢。

文貴一首

貴字天爵，湘鄉人。廣甯左屯衛籍。成化乙未進士，授御史，累官布政使，擢右副都御史，巡撫延綏，進兵部侍郎，兼左僉都御史，提督宣大軍務。

還湘上故里讌集褚公祠

馬邑龍堆白草肥，牙旌高捲塞鴻稀。還鄉爲報浮湘客，飛鳥依人已倦歸。

朱訥一首

訥字存仁，寶應人。成化丁酉舉人，除鄞縣知縣，改長陽，再改江陵。

燕

三月巢乾雞未成，茅堂來往日營營。說殘午夢千聲巧，剪破春愁兩尾輕。官柳陰濃金鏤合，水芹香細綠

波晴。畫闌十二無人倚。一半梨花一半鶯。

萬綸一首

綸字允言。永昌人。成化丁酉舉人。除武岡學正。遷長史。有西窗集。

雜詠

謝卻紅塵二十年。歸來林下興悠然。小橋流水通雲谷。老屋青山繞石田。野杖斜穿花徑雨。釣蓑輕帶柳溪煙。誰言光景西山薄。自有金丹可斡旋。

楊守陞一首

守陞字維立。鄞人。成化戊戌第二人及第。授編修。遷南侍讀。召修實錄。遷侍講學士。擢南吏部侍郎。加尚書致仕。有碧川文鈔二十九卷。

曹學佺石倉詩選。成弘時人文爲盛。而公家爲尤盛。文懿起於前。公與康簡寶之。一時羣從登朝者六人。公舉望尤著。而歿後易名之典。至今闕焉。蓋公視篆翰林時。適遇朝廷一日間。升傳奉官四十員。科道上章。因下詔獄六十員。言路一空。公移書當軸。謂當極力申救。不宜作缺更補。語甚切直。而當軸者不能從。吳門沈啓南爲作詩以侈其事。始大忿恚。陰構之於新都楊公。謂已推轂新都爲東宮講官。而不及公。以此爲憾。新都領之。未幾公與當軸者俱逝。疏請易名。而新都兩靳之云。石田詩板。當時已被毀。其續集刻無此詩。謹拈此段。以備採擇。

孝陵恭謁有述

淮海龍飛入建康。金戈鐵馬淨機槍。不階尺土興如漢。盡復華風治邁唐。三紀袞衣明日月。萬年陵寢肅風霜。小臣瞻拜祠宮外。惟見參天樹色蒼。

楊廷和一首

廷和字介夫。新都人。成化戊戌進士。選庶吉士。授檢討。歷修撰。侍讀。中允。春坊大學士。少詹。詹事。入東閣典誥敕。遷南吏部侍郎。進南戶部尚書。召還。除戶部尚書。進文淵閣大學士。參預機務。改吏部。屢加少保。太子太保。少傅。太子太傅。少師。太子太師。進武英殿大學士。再進謹身殿。華蓋殿。以議禮削職爲民。隆慶初復官。贈太保。諡文忠。有石齋集八卷。

送神武蔡千戶致仕還湖州

神武挂冠歸舊隱。赤松相伴話長生。太湖合是逃名地。畫舫絃歌自在行。

劉忠五首

忠字司直。陳留人。成化戊戌進士。選庶吉士。授編修。歷侍講。侍讀學士。掌翰林院。遷南禮部侍郎。進尚書。改南吏部。召還。拜吏部尚書。兼文淵閣大學士。參預機務。加少傅。兼太子太傅。進武英殿大學士。贈太保。諡文肅。有野亭遺稿八卷。

田按太保不以詩名。七言斷句。有古人風調。

內進元宵詩二首

太乙祈靈陋漢風。上元遺俗古今同。君王崇孝排淫祀。移取熬燈壽兩宮。
寶月華燈繞殿廊。九重歡進萬年觴。東風似解同仁意。吹送笙歌出禁牆。

明皇擊毬圖

我勸韓公諫且休。多言不是殿頭謀。范陽場上逢盧李。蹴蹋神州等一毬。

宋故宮

二帝龍遊真不返。山河回念舊神都。格天閣上人凝望。曾有飛鴻繫帛無。

趙子昂苕溪圖

清詩寶墨浙東西。宋室宗臣漢獻齊。欲上汴州觀艮嶽。風光應否似苕溪。

梁儲一首

儲字叔厚。廣東順德人。成化戊戌進士。選庶吉士。授編修。歷侍講。洗馬。學士。少詹。擢吏部侍郎。進
尚書。以事降侍郎。尋復職。加太子少保。調南吏部。召還。以吏部尚書兼文淵閣大學士。入參機務。
屢加少傅。太子太傅。少師。太子太師。進建極殿大學士。再進華蓋殿大學士。贈太師。諡文康。有鬱
洲遺稿十卷。

留都吏部公讌

故人交誼重南金。畫省風流許重尋。千里雲霄遠比翼。十年江漢阻知音。祥鸞自合歸阿閣。倦鳥惟思返故林。多謝北堂今夜月。後來應照我遐心。

林俊六首

俊字待用。莆田人。成化戊戌進士。授刑部主事。遷員外。以事下獄。謫姚州判官。遷南刑部員外。擢雲南按察副使。進按察使。改湖廣。引疾歸。起廣東布政使。不起。起僉都御史。督操江。改巡撫江西。進右副都御史。改四川。遷右都御史。致仕。起工部尚書。改刑部。加太子太保。致仕。卒。追論議禮削職。隆慶初復官。贈少保。諡貞肅。有集五十四卷。

四庫總目。俊詩多學山谷。後山。頗多隱澀之詞。而氣味頗能遠俗。藝苑卮言。林待用如太湖中頑石。非不具微致。無乃凝重。

田按。尙書詩晦澀者不必言。時遇疏豁者。如絕壑疏林。別有風景。

題松雪山水

山水何人稱絕奇。吳興松雪老畫師。鄭虔祁岳不足數。前身合是病王維。與可胸中有成竹。此老林壑故不俗。輕綃落筆百態生。奇形遠勢相追逐。長松自昔參天材。疏髯碧淨無氛埃。翛然茅屋二三子。衡門靜

掩荒蒼苔。袒跣無營。百事拙。竹裏漁舟臥秋月。壯歌激越。遶空翠。散亂白波。舞晴雪。老子家住雲水鄉。披圖見此心如狂。藤蓑穩著。賦歸去。倚天一笑江茫茫。

夏賴

日長了官事。倚杖大溪濱。沙石淨臨水。煙花閒度春。科頭風到竹。招手鶴隨人。茅屋青邱晚。漁樵感卜隣。題清上人山房

亂松深古寺。衰謝白雲期。生滅慧燈靜。晴陰疏磬知。檐虛江色遠。日薄鳥聲遲。錫杖西來意。曹溪亦幾枝。翠亭草堂

名家傳筆格。處士接丰標。泉石境難畫。耕漁興可招。杜門消短日。飽飯答清朝。引鶴西湖路。春風第二橋。和韻

細柳新蒲綠映溪。釣船閒與鷺羣棲。覓來野火晚煨葑。踏碎山雲春拾藜。流水不緣催老去。飢鳥似欲向人啼。石牀對月清難夢。起步星河又轉西。

仙遊

紆徑層巒鳥道。蒼煙碧水人家。石潤每含山雨。溪深時放桃花。

陳章一首

章字一夔松江華亭人。成化戊戌進士。授刑部主事。歷員外郎中。擢湖廣按察副使。未行。降瑞州同知。遷高州知府。改黃州。有西潭稿。

楊循吉七人聯句詩。記陳一夔好作詩。醞釀典則。時有真詣語。如秋懷云。人老漸驚生白髮。家貧未辦買青山。余以爲自然妙句。君語余公。作語須發得自家意思出。乃佳。余久有此意。口不能道。得君言。遂添一悟境。

田按一夔在別部時。與居元勳。林待用。陳隨之。秦廷贊。王存敬。趙栗夫。相倡和。其卒於高州也。王存敬哭以詩云。別路同攀耆柳條。聞君秋駐海南輶。書來自喜州無瘴。運去那知鬼作妖。子建詩雄空蓋世。宗元謫死不還朝。黃梅嶺外鞦韆雨。零落殘魂誰與招。

賈島峪

故庵尙在青山裏。卻說長安片瓦無。早有詩名驚吏部。勸加巾服變浮屠。回看全賀風斯下。上接岑王道。不孤我獨愛君詩瘦健。推敲想亦費工夫。

李韶一首

韶字□□。富順人。成化戊戌進士。歷工部郎中。擢雲南參政。遷江西布政使。

秋浦

秋浦生晚煙。蟬聲在高樹。時見打魚人。來喚斜陽渡。

黃文琳一首

文琳字潤玉。莆田人。成化戊戌進士。

見梅花有懷

梅花初破臘。千里憶同心。欲寄憐途遠。將攀愁雪深。煙生極浦晚。日落半溪陰。倚閣情無限。淒然望碧岑。

鍾瓘一首

瓘字良玉。永豐人。成化戊戌進士。除咸甯知縣。有蜚秋漫稿。

題南山觀壁

南山遠勢連空同。山下樓臺煙霧中。東海仙人影在壁。月波道士顏如童。嵐光和雨滴春翠。丹氣浮天接夜虹。憑高一笑空宇宙。俯視下土塵濛濛。

林廷選一首

廷選字舜舉。長樂人。成化辛丑進士。授蘇州推官。遷監察御史。出爲浙江僉事。進副使。歷廣東按察使。布政使。南大理卿。以右都御史。總督兩廣。拜南工部尙書。有竹田集。

泊蘭溪

縣枕青山驛傍溪。行縱已徧浙東西。高林樓閣畫圖出。繞郭峯巒屏障低。柏燭迎春金縷字。香醪過夏甕封泥。泊舟不寢思鄉切。坐聽灘聲并鳥啼。

趙寬一首

寬字栗夫。吳江人。成化辛丑進士。除刑部主事。歷員外郎中。出爲浙江提學副使。遷廣東按察使。有半江集。

田按栗夫集名半江。邵文敬亦名半江。詩品略相似。

觀蕭淩漢所藏東坡題識文湖州墨竹

霜縑閱世五百年。鵝黃半落浮殘煙。光搖翡翠秋娟娟。怒蛟蹶張虬盤旋。漠漠遠水連長天。錯刀翦玉聲戛然。誰哉置我冰崖巔。纖肌發粟思重綿。坡翁老可骨已仙。何事突兀參吾前。高風逸韻橫八埏。欲攀雲髯手攀拳。昨夢明月生玉川。

張吉一首

吉字克修。餘千人。成化辛丑進士。除工部主事。以言事謫景東通判。遷肇慶同知。歷梧州知府。廣西兵備副使。擢貴州布政使。有古城集七卷。

暮投上葉村

白妥紅殷翠欲勻。小園猶見未殘春。盤中細蕨兼新筍。卻喜山家風味真。

盧格二首

格字正夫。東陽人。成化辛丑進士。除貴溪知縣。擢江西道御史。有荷亭集。

田按劉念臺荷亭集序。稱正夫令貴溪。多惠政。以母老乞歸。築荷亭三楹。鍵戶不出。奉養外。日取古人書讀之。所著荷亭辯論十卷。與朱子異同十六七。誠明辨之士也。詩亦有風格。

江行

夜闌酒初醒。風物無限情。松壑發靈籟。蘭槳擊空明。徘徊復徘徊。懷抱一時清。

西湖

十里湖光綠染衣。滿船燈火夜忘歸。憑誰寄語林和靖。近歲梅花學雪飛。

葉元玉一首

元玉字廷璽。清流人。成化辛丑進士。歷戶部郎中。出爲潮州知府。有古厓集。

次高郵湖

湖水漫漫無畔岸。風波日日有人行。輸他林下幽棲客。閒看梅花破雪清。

方向一首

向字與義。桐城人。成化辛丑進士。授南戶科給事中。以言事謫多羅驛丞。後官瓊州知府。

山中雜咏

薄雲不成雨。山中有餘白。月光墮尊酒。照我衰顏色。舊交日已遠。芳時坐來歇。惆悵平生懷。今夕竟何夕。
鄭瑗一首

瑗字仲璧。莆田人。成化辛丑進士。授南禮部主事。遷郎中。有蜩笑集。
將進酒

我有斗酒甘如飴。何以斟之金屈卮。青髯倏忽成白髭。今我不樂日月馳。君不見三閭大夫號湘纍。獨醒不肯啜其醑。身後虛名徒爾爲。爭如隴西李謫仙。醉騎鯨魚飛上天。

彭甫一首

甫字原岳。莆田人。成化辛丑進士。累官廣西提學僉事。有忍庵集。
題畫

暮雲收盡青山出。靈籟數聲風動松。鷗鳥無心自歸去。臥看明月上孤篷。

明詩紀事卷八

丙籤

邵寶七首

寶字國賢。無錫人。成化甲辰進士。授許州知州。入爲戶部員外郎。歷郎中。遷江西提學副使。歷浙江按察使。進布政使。改湖廣。擢右副都御史。總督漕運。以忤劉瑾致仕。瑾誅起。巡撫貴州。遷戶部侍郎。進南禮部尙書。卒。贈太子太保。諡文莊。有春容堂前後集三十四卷。續集十八卷。別集九卷。四庫總目。寶詩清和澹泊。能抒寫性靈。

田按文莊詩格平衍。其蘊藉入古處。則學爲之也。在茶陵詩派中。不失爲第二流。

送僧圓顯住慧山寺

寺據諸山會。公因一檄來。夢驚松閣雨。歸掃石床苔。得主憐西社。遺書釣北臺。野雲心迹在。古洞傍泉開。

三竺道中

人行松徑靜。數里不知遙。路轉還逢寺。僧迎只過橋。岩姿收獨妙。泉響息羣囂。東去頻回首。山花似我邀。

重登松風閣

天風滿榻坐參禪。上有松聲下有泉。高閣重來三紀外。老僧誰起百年前。茶爐夜濕曇花雨。畫壁春銷劫火煙。最是瀧岡猶未表。北山回首思潛然。

山中懷楊儀部

未得登君野性堂。兩年清夢獨難忘。笑談每怪逢僧懶。文字猶嫌應客忙。山月挂松真灑落。海雲迎鶴更昂藏。吳天楚地同秋水。老盡蒹葭一夜霜。

贈周山人

曉起空庭月在松。慧山寺裏初鳴鐘。詩翁見訪來何早。第七峯前一短筇。

贈錢校書

夫椒山前孤草亭。水風吹月秋冥冥。客來鶴去主人返。七十二峯湖上青。

泊儲潭

儲潭廟前春水深。春雲帶雨晝陰陰。撞鐘擊鼓禮神去。一十八灘行路心。

儲罐十四首

罐字靜夫。泰州人。成化甲辰進士。授南吏部主事。歷郎中。改北。遷太僕少卿。進本寺卿。擢右僉都御史。總督南京糧儲。召拜戶部侍郎。引疾歸。起南戶部侍郎。改吏部。嘉靖初。謚文懿。有柴墟集十

五卷 馴野集一卷

容春堂集柴壩詩渾雄跌宕洒落清遠風雅遺音公蓋有之

靜志居詩話文懿掉鞅詞場與楊君謙徐子仁杜樾居杓契君謙嘗題扇寄之文懿愛惜緘題字未開視也一日子仁樾居過出扇作畫文懿因題詩寄君謙云爲情緘題入手遲清風千里故人思畫成一事知還欠封寄江南乞寫詩亦屬林韻事也田按柴壩以西涯爲師空同爲友故詩力雄厚迥異臺閣之體

廷章文光邀遊龍潭寺賦謝

蒼山宛龍蟠南棹琅瑯尾潺潺兩崖間一綫行如蟻崎嶇度澗杓蒼莽拂林卉何年鑿靈巖佛閣擅雄偉長年環滌思江介浮一葦及茲偕良遊落落故人幾肝腸苦雕琢鬢髮銷讒誹歷覽石上題留詩吊山鬼兩公廊廟具名姓在丹辰空山豈久留且醉月生朏

過玄武湖

北山飛翠凝吾杯舟人舉棹相徘徊城隅捩舵踏冰入船底軋軋聞春雷霜風吹衣衣欲裂湖天泱泱疑飛雪司空勸飲夕郎酬始覺微酣生頰熱中流咫尺冰盡開沙禽水鳥忘驚猜新洲昨夜梅花發暗香偏逐詩人來湖波爲帶城爲被冊府圖書眞得地堪笑前朝建此都只將山水供遊戲鍾山龍蟠幾百里下有龍宮藏劍履山中老樹盡成龍夜夜飛來飲湖水湖波直與銀河通背城一派垂晴虹柏梯高寒石梁

迴十洲三島神仙宮。長堤隱隱湖心路。隄上行人自來去。春風楊柳夏芙蓉。換盡年光顏色故。世間萬事如雲煙。湖光山綠只依然。不及湖中魚與鳥。涵泳恩波今百年。

清源舟夜

十年三往復。此地忽重經。塵土長安夢。煙波汶水舲。平川涵夕景。遠樹隱春星。魯酒偏難醉。從人笑獨醒。彭城有懷

金臺

清夜棹歌發。高秋客思生。綿綿鄉國夢。歷歷水雲程。老樹危蟠石。衝波怒啣城。白門樓上月。偏傍海東明。萬里長風動。薛蘿眼中燕。趙共山河。趣程未辦登高賦。問俗猶傳擊筑歌。喬木幾經荒塚盡。斜陽偏傍故臺多。黃金不解縱橫厄。疑有冥鴻避網羅。

大房金源諸陵

長白山高朔漠連。金源風致故依然。千秋魂魄猶思沛。萬里邱陵卻到燕。感事重翻江統疏。傷心莫問靖康年。幽蘭一曲雄圖歇。汝水悠悠入墓田。

再次盤山峯字韻答恆叔治中

羊腸空曲倚連峯。上有燕人避世蹤。樂土不煩沙嶺戍。廢垣曾傍石門封。雲中秋興歌黃鵠。天際江聲瀉

黑龍見說漁陽豪俠地。田疇栖處有誰從。

屢卜居未遂

僦屋都城已十年。移從東陌復西廛。傍人門戶終低首。老我風塵未息肩。江海故墟三畝宅。歌鐘甲第萬緡錢。一枝應被林鳩笑。今在長安若箇邊。

次克溫南宮賞魏花

南宮花發滿朱闌。對酒先判十日看。彩筆舊傳才子夢。青綾誰道主人寒。明粧向晚圍紅燭。妙舞迴春試翠盤。空艷花枝無好句。東風應笑客衰殘。

次韻謝武靖伯惠茉莉茶

茉莉香浮碧椀新。槍旗猶帶建安春。何人更汲中泠水。來餉松廳病暑人。過西墅看竹

雨後初分一畝涼。西園合有墨君堂。籜龍不用愁斤斧。坐看新梢百尺長。郊行

淩競瘦馬踏春泥。雪後郊原綠未齊。一抹午煙風隔斷。野雞聲在竹林西。村舍前杏花爛開

錦樹成團爛漫春。毀垣荒舍未全貧。碧雲欲合斜陽淡。最是無言更惱人。

題極樂巖龕

老樹輪囷怪石棱。烏鳴猶在白雲層。山中歲月非人世。輸與巖龕打坐僧。

喬宇一首

字字希大。太原樂平人。成化甲辰進士。授禮部主事。改吏部。歷員外郎中。遷太常少卿。光祿卿。擢戶部侍郎。進南禮部尚書。就改兵部。召拜吏部尚書。加少保。兼太子太保。贈少傅。諡莊簡。有白巖集二十卷。

列卿紀。喬公詩始擬古作。後擺落陳辭。往往多自得語。樂府雄雉。有作者風氣。

藝苑卮言。喬希大如漢官出臨遠郊。亦自粗具威儀。梁維樞玉劍尊聞。徐霖嘗語人。有明以來。喬字篆法。第一。人莫敢望。

東園卽事

名園列嘉燕。晴旭散輕陰。地比東都勝。情同北海深。山屏環坐隱。林籟答行吟。仙迹移城市。桃源路可尋。

王雲鳳五首

雲鳳字應韶。和順人。成化甲辰進士。授禮部主事。歷員外郎中。以劾太監李廣誣下獄。謫陝州知州。遷陝西提學副使。歷山東按察使。召爲國子祭酒。以僉都御史。巡撫宣府。有博趣齋稿。

國史唯疑劉瑾末年欲收羅人望。蔡清、王雲鳳俱以致仕起兩京祭酒。蔡未聞命卒。王輒請瑾臨太學。如魚朝恩故事。復請較刻瑾近行法例。永俾遵守。雲鳳甫釋褐。知禮。蔡清爲師。中緣忤李廣謫。生平可觀。不意未拔猖至此。晉人猶以侶喬宇、王瓊並稱三鳳。不知何說。

田按河東三鳳。白巖品學政績稱最。晉溪、虎谷俱以交納嬖幸爲玷。虎谷文采較晉溪差優。如洮水南分羌部落。鐵城西控漢山川。天連瀚海雲常慘。風起龍沙客自愁。草侵戰血秦王壘。塵沒離梁寶氏宮。老僧相見坐無語。一院野花山寺秋。皆可誦也。

青陵臺

青陵臺。何崔嵬。妾心已爲夫堦死。蛾眉肯向君王開。地下幽魂相對語。樹頭嬌鳥求其侶。祇今名姓記韓憑。高臺何處是青陵。

晚坐聞雁約張用昭登金童山

春雨生泥罷出遊。小窗疏竹晚來幽。家書每向烏占喜。客枕那堪雁送愁。幾日吟毫粗適意。經年文案苦埋頭。故人欲共壺觴約。一上金童百尺樓。

商州道次韻

風葉蕭蕭點亂山。愁人到此一開顏。稗子林間驅犢出。老翁澗底負冰還。

孟仲平墳

祝融祠下仲平墳。走馬來尋日已曛。十載故人凋落盡。空山無處覓機雲。

送任中夫歸太原

旅館相逢卽故鄉。別筵誰遣近垂楊。燕山二月春猶薄。欲贈煙絲苦不長。

張志淳一首

志淳字進之。永昌衛人。成化甲辰進士。授吏部主事。歷員外郎中。遷太常少卿。進本寺卿。擢南工部侍郎。改戶部。有南園集。

田按侍郎南園漫錄錄各十卷。四庫僅錄漫錄十卷。余兄崑山宦滇。購得完本。余採滇人楊琮、陶甯詩。皆據此本也。其中尙有論詩一則云。永昌府既革。元之府學盡毀。然間有作詩者。皆可觀。如山行云。山勢似墮未墮。水聲欲停未停。行過小橋回首。天然一幅丹青。惜未著作者名氏。

春園

長憶曾遊李監園。一時名勝動都門。別來陳迹已如夢。偶記新詩還可論。小宅自收三畝俸。緇塵迴隔九衢喧。今年黍稌占豐候。多辦糟邱少辦飧。

蔡清一首

清字介夫。晉江人。成化甲辰進士。授禮部主事。改吏部。歷禮部員外。南吏部郎中。遷江西提學副使。以忤甯藩引疾去。起南國子祭酒。命下卒。有虛齋集六卷。

別鄒汝愚謫雷州吏目

慷慨出門去。默與千秋期。飽喫惠州飯。少和淵明詩。

張詡二首

詡字廷實。番禺人。成化甲辰進士。授戶部主事。徵拜南通政司參議。有東所集十三卷。

田按廷實白沙弟子。有句云。千篇擊壤詩陶性。然其所作。殊不類擊壤也。

光孝寺

百粵山川秀。三城甲第雄。笙歌開院落。雲霧隔簾櫳。人物消應盡。江山變不窮。昔爲虞氏圃。今作梵王宮。

泰和舟中秋與友人玩月

潦倒江湖百不能。逢君殊覺喜懷增。停舟共賞中秋月。促席高燒兩夜燈。國士低徊心耿耿。客途跋涉鬢星星。明朝又作澄江別。快閣無心擬一登。

楊循吉四首

循吉字君謙。吳人。成化甲辰進士。授禮部主事。以病乞歸。有松籌堂集十二卷。都下贈僧詩一卷。菊花百詠一卷。齋中拙詠一卷。燈窗末藝一卷。攢眉集一卷。

藝苑卮言。楊君謙爲儀部主事。與郎中不得。因謝病歸。久之。病良已。起復除原官。君謙多病而好讀書。最不喜人間酬應。嘗開卷至得意。因起蹕掉不休。人遂相呼顧主事云。復官彌月。再乞病告。吏部以格不可。曰。郎病已復病耶。安得告。而可爲者致。

仕耳。君謙患曰：吾難致仕何？卽自劾罷。時僅三十餘，旣以歸，益亡復問外事，而蹤跡益詭怪寡合。出敝冠服，羸輿馬，故以起人易而更侮之。又好緣文章語，中傷人，正德末，君謙老且貧，嘗識伶臧賢爲上所幸愛，上一日問誰爲善詞者，與偕來。賢頓首曰：故主事楊循吉，吳人也，善詞，上趣爲詔起。郡邑守令心知，故強前爲君謙治裝。見君謙冠武人冠，韎韐戎錦，已怪之。又乘勢語多侵守令，已見上畢，上每有所幸燕，令君謙應制爲新聲，咸稱旨，受賞亡異。伶伍又不授君謙官與秩，間謂曰：若嫻樂能爲伶長乎？君謙愧悔汗洽，背謀於賢，乃以他語懇上放歸，益不自憚。諸後進少年非薄之，亡禮問者，而其文亦漸落不復進。卒窮老以死。所著奚囊雜纂未成書。

續吳錄：安君嘗云：楊君謙先生過大父，令題家君扇，語以當擴大其意。遂題云：山人捫摸臂次笑，煙水萬頃雲千層。又題一畫扇云：一竿竹，一笠簑，知是陸魯望，知是張志和，醉醒張眼問人世，我是何人識得麼？又題云：蠶豆香生澗水深，溪邊閒立聽風吟。有人識得寒山子，直到天台寺裏尋。此皆過家君時頃刻書，故載之。

筆精：吳郡楊循吉初授官，卽致仕歸，讀書支硎山南華寺。沈石田賦詩以美之云：到手功名賦子虛，深山長谷覓安居。讀書已足功名事，更讀人間未見書。都門祖帳百花飛，多見龍鍾賦式微。較取柳條千萬折，不曾送一少年歸。

談遷：雲林雜俎：武宗南巡，於北固山上見楊循吉留題，因召見行在，見上不能對，遂罷遣歸。忌者因以爲伶人臧賢所薦，不知此際循吉貧不能糊口，其赴召也，典衣爲裝，惡從市伶人。王元美輕信，筆其事於卮言，因而傳播天下。冤哉！徐文貞云：世廟初年，欲起君謙，聞其頓而止。楊公實頓，不以伶人事也。愚按：正德十六年癸未，於京師，是日卽杖臧賢等於午門戍邊，安得從南巡薦循吉也？又江甯徐子仁霖亦曰：臧賢所薦，是年十二月上至南京，賢死久矣。流聞之謬如此。

田按：君謙才力富贍，徒以不受古人檢束，取易曉於里夫豎子，故體多近俳，然集中合作，如詠陽山雲泉菴大石，詠石假山諸篇，未嘗不嘆爲奇寶也。

詠陽山雲泉菴大石奉和諸公同遊聯句

潭哉此陽山。有石俟歌誦。形將冰塊截。勢與蓮花共。仰觀一何高。登陟不可輕。鳥飛必徊翔。雲出自騰淪。孤員外成嶠。空朗中含洞。瘦如辟穀良。清若食蜋仲。深思殆天設。乍至令人恐。濃蘿作垂陰。寒泉滴爲凍。戴菴亦顛危。攜觴更交綜。耳脇或駢攢。勒拳時獨送。巍巍上少並。森森下多從。荒厓始誰開。倒樹諒非種。在茲三吳間。當以九鼎重。崇巖借冠冕。卑巒聽提控。勞呼猿固匿。被壓松堪訟。曲躬始得門。側身還入衛。拂苔劣容眠。收乳兼資用。志猶記秦餘。材曷遺禹貢。立久氣濕袍。嘯高聲達甕。論年越殷周。言時晦唐宋。一爲佛者居。永作遊人奉。病宜謚作史。寐稱搏養汞。四方傳不誣。諸公評切中。臨谷足還酸。乘巔目徧縱。支頤詎厭看。極口難竭諷。鬼鑿手須胼。鯨負背應痛。東岱徒小魯。西華繆推雍。懸磬風發鳴。香爐煙結供。曝沙伏靈龜。食岡停遠鳳。是知隆拔羣。所貴秀合衆。偷餘殿容榱。就隙亭閣棟。枯藤蔓穿竅。長蛇舌擦縫。輕盈受指彈。玲瓏脫泥壅。芾拜本無忝。羽撼爭得動。栽培稀尺閑。構架靡寸空。炎伏涼自生。清秋月堪弄。林深必賴燭。嵐酷能作魘。星光猶立芒。龍吟殊叶筓。嶺獅馴已賓。阜虎甯敢聞。久嗟隔勝賞。頻勞落清夢。卽欲營終棲。其奈懷微俸。

田按姑蘇志。陽山一名秦餘。杭山一名萬安。在城西北三十里。高八百五十餘丈。逶迤二十餘里。以其背陰面陽。故曰陽山。一支東北過金芝嶺。曰礮山。山北大石湧出。如蓮花。上有雲泉菴。吳匏菴陽山大石巖。雲泉菴記云。陽山視諸山雄偉特甚。其陰石巖然起。如人負奇骨而佩者。當巖釜礮磴間。有僧居在焉。成化間。予與太僕少卿李貞伯。吳興張子靜。松陵史明古往遊。自

潯墅北轉入小溪，舍舟從平田行，仰見石勢欲墮，舉足甚恐，入門竹樹幽茂，薜荔滿牆，僧緣屋架木，有小屋在石下，益奇喜而
就宿，聯爲長句云：巖巖者大石，李奇觀人所誦，遐想十年餘，吳來遊五人共，舍舟始登陸，張杖策不持鞋，是時日當夕，史茲山
氣逾滂，入門信突兀，李拾級駭空洞，落星何破碎，吳靈鷲相伯仲，仰觀神欲飛，張俯瞰心壓恐，鱗皴苔薜剝，骨立冰雪凍，史神
驅道擔呵，李鬼劈文錯縱，尊嚴凜君臨，吳張拱儼賓送，環列盡兒孫，張擁護等僕從，欲假愚公移，史諒非雍伯種，臥鼓慨桴亡，
李對白怯杵重，猊吻呀未收，吳龍颯怒難控，凝血疑痛鞭，張立肺詎冤訟，上漏還啓窗，史中通自成衛，大帷補天功，小可矜肌
用，分矢肅愼來，李浮磬泗濱賁，張廉利並攢劍，兀臬側倚壘，嶧山尊羣秦，吳良岳遺汴宋，節彼民俱瞻，張壯哉客難奉，史落照
紅抹赭，歸雲白流汞，何講點頭響，李將射沒羽中，塵絲契三生，吳陣圖懷七縱，張在縣太師擊，攻玉詩人諷，仙姿充腹飢，俗指
免腰痛，瑤琨產維揚，吳琅玕出乃雍，高題少室名，李怪作東坡供，半空見玉蟬，千仞附青鳳，張栖禪逾百年，間僧僅三衆，悲慮
園曲闌，吳架閣出飛棟，史竹幽補堂坳，樹古嵌屋縫，寶黑炊煙熏，李坎平鍾乳壑，盤盤棧道危，吳灔灔水泉動，張登頓足力疲，
眺望眼界空，史松露髮欲濡，潭月手可弄，吳窮扳任生鞍，李醉吟微帶臄，列坐對鸞跽，張大乎應錦碯，嗜癖牛李愚，史詩戰鄒
魯闕，拜奇得顛名，憂孽成噩夢，吳試與叩山靈，肯背捐薄俸，李君謙此詩，卽和匏翁等韻也，匏翁又跋大石聯句後云，予與諸
公大石聯句，偶寄一時之興耳，二十年來，不意和者之多如此，主僧智韜，持以來見，韜云，自公留題後，菴名盛傳於時，游者不
絕，匏翁又云，予再還吳中，太僕以下，相繼而逝，不能獨遊，徒得沈啓南所作巨圖，時取而玩之，余檢姑蘇志，有啓南大石狀詩，
附錄於此，望望秦餘杭，首尾行不了，大石突其尻，翹然一拳搗，山體厚藏骨，吐秀此特表，正類抱中嬰，頭頂露於襟，形大氣則
散，趣足喜在小，其深雖未卽，接目遠已好，頃來莫能窮，繼至敢草草，循牆道林麓，記曲乃遺杏，登登覺向峻，漸漸駕木杪，猊峯
據門左，呵禁口欲齧，有磴沿百級，有殿嵌山造，並殿跨偃石，懸身龍螭矯，行人自其下，恍惚怖四爪，轉高踏其背，股慄身亦掉，
鎮腦結佛亭，所仗力可掣，四壁滿題句，貴賤成雜埽，次尋巖間寮，蜂房互窺窺，綠勢盜西向，局地窄接櫟，雲磴中貫穿，所歷平
坦少，陽崖詫脣歎，陰竇疑日管，虛舍風颼颼，濕映雲稍稍，衆綱不可戾，亂壘重折北，層層百寶合，正紺或廟縹，危椒壓屋脊，

雨常怯倒。蒼松長深縫。半落萬羅鳥。斜見山桃花。微紅映叢篠。既夕氣更佳。延月象倍皎。尙欠一踏雪。意先有瑤島。東坡若初去。援例我非狹。山僧苦著相。便覺生煩惱。

石假山

何哉奇復奇。聚此照眼碧。玲瓏千百竅。突兀八九尺。中居獨尊嚴。傍擁互扶掖。猊雄怒張吻。馬瘦高見脊。枯藤絡巖生。老檜鑽坼坼。網湖水獻寶。斧山雲失宅。飛來鷺峯峩。推開劍門割。狎觀常解帶。肅拜或呼幘。勢掩肺腑層。形標拳臂隻。浪淘猶見紋。虎爪仍存迹。朝惟講僧坐。夜乏將軍射。三槎非可參。一竿茲乃積。曲折畫手知。巧妙詩家得。陟磴披翠簑。臨池扣金鯽。林泉釣初心。漁樵盟舊癖。空支九節杖。莫縱千仞屐。窗窺雖眇小。意賞同弘碩。幸忝司郡人。甯愁竊中夕。

都下夜集對雨聯句

高筵敗秋雨。王仁甫頓爾淨餘燄。得非洗我塵。徐寬似欲添君酌。階前渠溜走。趙寬燈下檐花落。來遲路遂阻。陳章坐久衣轉薄。暫停得耳靜。王弼忽至令心愕。蕭蕭佐歸懷。楊循吉潺潺亂歡譁。翻盆入杜詠。侯直名亭見蘇作。浸深牆可危。王仁甫泛滿庭堪濯。徙穴蟻何智。徐寬歸林禽亦樂。來如銜枚陣。趙寬響失巡階柝。諸公競解帶。陳章羣僕皆赤腳。積陰已連朝。王弼浮潤先徵昨。良賓坐自困。楊循吉好主投不錯。決明色猶鮮。侯直梧桐意方索。滴成老況愁。王仁甫激起鄉思惡。客方利河漲。徐寬我亦思屐著。試將聽官舍。趙寬何如枕山閣。朝街泥想尺。陳章漏地

水驚勾。忙身夜竊暇。

王仁市

病體涼得藥。對酒今則同。

楊循吉

逐事明又各。搜吟思已倦。

侯直

願且更束約。

王仁甫

七人聯句詩記。余頃得請。將還山中。承古直老人一襲。存敬。公繩。栗夫。四刑部。約以飲食過余作錢。次日爲八月二十四日。丁酉。余命家人掃地布席。栗夫工部適至。諸君繼至。徐栗夫將起去。余與諸君共挽留之。遂復入坐。時日暮雨作。乃命家僮出肴核蔬菜。陳列几上。又令別設一小案。具紙筆以待。諸君敘坐。古直老人。黃岩王仁甫。南向左位第一。工部主事。海甯徐栗夫。寬南向右位第二。刑部主事。松江陳一襲。章北向左位第三。刑部主事。黃巖王存敬弼。北向右位第四。刑部主事。華亭侯公繩。直西向左位第五。刑部主事。吳江趙栗夫。寬東向右位第六。禮部主事。吳郡楊君謙。西向次公繩之下。位第七。酒行家僮以紙筆進。余請於諸君。作長句爲樂。因復請立一人爲詩監。以典賞罰留駁。就請命題。以趙栗夫爲之。栗夫曰。今對夜雨。只此可詠也。詩用五言。以落字爲韻。誠曰。詩只詠雨夜事。不許汗漫無干。如此者。罰酒。仍不准。詩聽詩監詳定。於是古直老人先唱一句。諸人繼成之。共二十一韻。爲句四十二。爲言二百十。爾我交評。咸以爲佳詠。方聯句時。一客秉筆搆思。則六客無事。一巡詩至。須待二三刻。余以爲不樂。乃僭立一令。裂紙如掌。闔者七紙。請於趙栗夫曰。聯句未至時。請各自述一詩。述不當者。詩監主之。栗夫曰。諾。余乃以六小紙散諸君之前。而自留其一。時徐栗夫先成曰。黃金臺下雨聲稠。白玉橋邊水亂流。戀闕思親情更切。不堪今夜故人留。陳一襲次成曰。自笑馮郎老更迂。故山田舍半荒蕪。縱然麟閣在平地。未有丹青畫老夫。王存敬次成曰。七賢言志一燈前。次到迂夫獨寔然。食祿十年官再徙。不曾留得買書錢。楊君謙次成曰。長揖諸君從此辭。病人筋力自家知。如今祇抱醫方看。做得功名也是癡。古直老人次成曰。秋雨繞檐聲滴滴。夜堂燒燭影輝輝。自憐王襲身飄泊。自首人間尚未歸。侯公繩次成曰。馬蹏日日走紅塵。自怪微官繫此身。滄海煙波無限好。未歸真是不如人。趙栗夫次成曰。苦憶東南山水隈。已無情緒走塵埃。何人先自清遊去。我有青鞋亦共來。諸君自述既周。是時雨益甚不止。而聯句猶未成。諸君各作此自述詩。與聯句無妨。始甚樂。余復以一詩未盡諸君之興。乃別作七圖著盤中。置几上。諸君訝問何爲。余笑曰。此當尤樂耳。乃請於詩監趙栗夫。

曰。七人當互相贈答。以圖爲定。諸君拈之。於是古直老人首得贈楊君謙。徐栗夫得主存敬。陳一夔得趙栗夫。王存敬得陳一夔。侯公繩得徐栗夫。趙栗夫得侯公繩。楊君謙得古直老人。拈既定。乃請乘聯句之暇。各爲之聯句。到則復輟而爲聯句。句成付肩下客。而爲謝答詩。誠無誤公事。於是徐栗夫遂贈王存敬云。根在丹崖葉在吳。百年鄉思豈能無。對君欲贈平生意。愧乏一雙明月珠。存敬答云。問字機休已駕車。我來還復挽君裾。留連未說鄉情好。今夜詩壇正要渠。栗夫本黃巖人。徙海甯。亦吳地。次陳一夔贈趙栗夫云。菜布街西新卜居。豈欄瓜蔓共蕭疏。胷中富有書千卷。誰笑家無儋石儲。栗夫得詩仰而笑。稱妙甚。衆客傳觀。皆賞以爲雅製。栗夫答云。風流故與時情別。樽散偏於酒趣深。未老便懷投綬計。知公天性在山林。時一夔雅有長往之志。次楊君謙贈古直老人云。草聖詩狂兩得名。家家歡喜老先生。翻嫌邵叟身多累。愛把車兒礙散行。古直老人答云。文章直可接前賢。江海知名已十年。手裏長篇許贈我。老夫今夜不能眠。次趙栗夫贈侯公繩云。涵洞胷中一事無。世情官況兩蕭疏。野人久坐春風裏。自覺年來鄙吝除。公繩答云。三百人中子實才。兩年書牘共秋臺。自憐茅塞無除理。卻謝先生爲我開。次王存敬贈陳一夔云。君家垣西低草堂。常有數斗白銀漿。五十官卑人不識。時時詩裏吐虹光。白銀漿卽一夔餉予白蓮花酒也。存敬詩師西江。一夔答云。梅黃詩句可爭能。素操兼看冷似冰。他日期君何處是。龍門寺裏一枝藤。次侯公繩贈徐栗夫云。建安詩派流傳遠。驥足曾馳七子中。夜雨燈前成邂逅。一談一笑得相同。栗夫答云。山思天竺連峯碧。鱸憶松江出水紅。兩地相過殊不遠。他年杖履可能同。古直老人贈楊君謙云。秋宗聲譽滿京華。壯歲詩文老作家。病後愈加才力健。不教天上草黃麻。君謙答云。誇世不過持爵祿。綴文亦是弄時光。但求身健無疾病。編緝閑談勝草黃。成化二十二年丙午八月二十六日。病子楊循吉記。

湖上

湖上魚吹細沫行。湖邊花草足風情。田分日影陰情別。水合天光上下清。頗怪病身逢酒健。久留眵眼待

山明農家識是游人過。競擁籬頭送櫓鳴。

黃瓚一首

瓚字公獻。儀真人。成化甲辰進士。授南戶部主事。歷員外郎中。出爲四川參議。歷浙江參政。江西湖廣布政使。召拜應天府尹。以右副都御史巡撫山東。遷南兵部侍郎。有雪洲集十四卷。

四庫總目。瓚詩多伉厲之響。

同畢嘉會送馮憲副還浙

廣陵淹畢誠。越山老馮唐。兩賢師友間。力障波瀾狂。翩翩遊子衣。獨與朔雁翔。汲古尙董井。銷魂更雷塘。胡然歌式微。綵服戀故鄉。江籬未堪折。遠思憑誰將。

董樸一首

樸字汝淳。麻城人。成化甲辰進士。歷重慶知府。遷參政。

國史唯疑董樸初登第。以使過岳州。謁劉忠宣於家。劉款之麥飯糟蝦。更無他具。董質者。矢服清操。先輩一言。動爲世運攸關。如此。

湖北詩徵傳略。參政詩自寫胸臆。正如繁音迭奏。忽聞幽鳥一聲。凡響皆寂。

易菴

笑傲白雲窩。生涯一笠蓑。引泉憑竹筧。補屋借藤蘿。溪煖魚初戲。林深鳥自歌。釣舟如葉小。從不識風波。

貢欽一首

欽字元禮。宣城人。成化甲辰進士。官順德知府。有湖亭集。

書吳氏壁

宛陵城外野人家。路入青山小逕斜。出水香芹低拂燕。過牆弱柳暗藏鴉。瓦盆溜雨新菖酒。石鼎飛煙旋煮茶。更愛主人留客久。春風齊放一亭花。

林廷玉六首

廷玉字粹夫。侯官人。陝西平涼衛籍。成化甲辰進士。授吏科給事中。改工科。以論事下獄。謫判海州。遷茶陵知州。歷廣東僉事副使。山西參政。入爲通政使。以僉都御史。巡撫保定。改南京總督糧儲。致仕。有南澗先生集。

田按粹夫以劾程克勤。覈題事。爲世所不直。史但書給事中華景。劾覈題事不實。調南京主簿。而遺粹夫事。克勤一時賢者。出獄後。憤懣卒。言者能不職其咎乎。錄粹夫詩。附著於此。

再至定林寺

白雲鎖禪關。松花落如雨。佳木翳繁陰。林深不知暑。老衲臥雲間。雪巔能梵語。吁嗟匡廬社。遠公在何許。叢臺

叢臺之上烏夜啼。叢臺之下草淒淒。趙王已去叢臺在。行人路上空栖栖。碧樹蟬鳴滹沱北。黃雲雁度王屋西。興亡千古盧生夢。芳草斜陽望眼迷。

林泉

柴門繫釣船。野徑唳幽鳥。山翁睡起遲。落花紅不埽。

漫興

把酒對芳春。風花能幾度。殷勤勸美人。竊恐春遲暮。

林下

高樹秋風急。疏林夕照斜。柴門臨水岸。幾簇拒霜花。

姑蘇

姑蘇城邊秋水清。姑蘇城上秋月明。吳王已去姑蘇在。半夜西風吹雨聲。

藍章二首

章字文繡。卽墨人。成化甲辰進士。除知縣。擢御史。歷大理寺丞。少卿。擢右僉都御史。忤劉瑾。謫撫州判官。起原官。巡撫陝西。遷右副都御史。進南刑部侍郎。兼僉都御史。改南工部。有勞山遺稿。

野興

白雲橫江天色空。江邊老木起秋風。幽懷欲吐無人見。曳杖危橋亭子東。

題畫竹

吳松江水似清湘。煙雨孤篷道路長。寫出無聲腸斷句。竹雞嘯處竹蒼蒼。

陳袞一首

袁字廷章。建昌新城人。成化丙午舉人。除天台知縣。改青田。遷儋州知州。汀州同知。仰山

絕頂龍淵照碧空。亂雲殘霧一重重。斜陽收拾丹青稿。畫出溪南雪後峯。

明詩紀事卷九

丙籤

費宏二首

宏字子充鉛山人。成化丁未第一人及第。授修撰。歷贊善。諭德。太常少卿。兼侍讀。擢禮部侍郎。進尚書。兼文淵閣大學士。參預機務。加太子太保。進武英殿大學士。改戶部尚書。致仕。嘉靖初起原官。加少保。進吏部尚書。謹身殿大學士。再進少師。兼太子太師。華蓋殿大學士。卒。贈太保。諡文憲。有鵝湖摘稿二十卷。

田按世宗朝。先以議禮。次以齋醮。君子小人。迭爲消長。然其初政。如費文憲。楊文襄。石文隱輩。未嘗不傾心延接。君寶臣和。史稱帝御平臺。賜宏御製七言一章。命輯倡和詩集。署宏銜曰。內閣掌參機務。輔導首臣。嘆其尊禮前此未有。余檢宸章輯錄。帝賜文憲詩云。每從古訓尋治理。歌詠研磨陶性情。詩成朕意或未愜。中侍傳宣出紫清。賜文襄詩云。才兼文與武。內外資安撫。寬朕西顧憂。遂使吾民康。賜文隱詩云。卿以延薦入。性資特剛方。在木類松柏。在玉如珪璋。可否每獻贊。忠實無他腸。張璁。桂萼。以議禮貴。忌宏寵。萼言詩文小技。不足勞聖心。且使宏得馮寵嬖。凌壓朝士。未幾宏璫皆去。一清被傾陷。發憤疽發背死。而璫致仕後卒。且得下謚矣。

雨霽

雨霽郊原潤。春深景物妍。煖雲低覆樹。流水漫成川。徑草碧如翦。檻花紅欲燃。呼童理耕稼。生計在農田。

睡起

習閒成懶百無功。塵事難侵世累空。睡起呼童向籬落。菊花枝上促青蟲。

石琚二十首

琚字邦彥。藁城人。成化丁未進士。選庶吉士。授檢討。歷修撰。南侍讀學士。國子祭酒。擢南吏部侍郎。召改禮部。兼翰林學士。掌院事。拜本部尙書。掌詹事府事。進吏部。入內閣。專典誥敕。尋詔以吏部尙書兼文淵閣大學士。參預機務。進太子太保。武英殿大學士。加少保。乞歸。卒。諡文隱。隆慶初。改諡文介。有熊峯集十卷。

四庫總目。琚出李東陽之門。東陽每稱。後進可託以柄斯文者。惟琚一人。琚詩文皆平正通達。具有茶陵之體。

列卿記。文隱詩歌成一家言。少師李文正曰。邦彥詩詞皆中矩度。而七言古詩尤超脫凡近。衆所不及。

藝苑卮言。石少保詩如坡沙揀金。時時見寶。

靜志居詩話。少保爰立。在永陵初年。是時諸臣以議禮忤旨。帝初欲爰以自助。而顧直自守。至三封內批。帝心弗善也。故雖位列中台。其詩多塞產而不釋。如云。屈勉二十年。十事九失意。又云。人生值命薄。所遇多不平。又云。誰云日偃仰。亦復成局促。又云。趾發物已迕。意行悔相連。又云。軒冕豈不華。一喜生衆惕。又云。幡幡鳴春鳥。解使朝變昏。又云。古來忠與邪。往往激褊淺。又云。苟移造化柄。養士亦易崇。又云。帝爲白壁諱。不作脂與韋。帝爲鈍劍折。不作鉤與錐。又云。事去朝露空。安辨窮與達。又云。牋語日綸綸。君臣互相諛。但聞都俞聲。無復嘯與吁。又云。終然千古下。忽有知己歎。蓋當日綸綸之間。未盡和衷之雅。一傳衆咻。

誰與爲善。乃知人生不得行胸懷。作相與不遇等也。

田按少保立朝嶽嶽。懷方不肯隨人作計。詩亦清音亮節。不愧詞人。

擬古傷歌行

葉落花殘君不見。春來秋去如飛電。富貴千年劫火灰。邱陵幾度桑田變。五侯高樓臨大道。寶斂金鈿埋秋草。張放甯知金穴平。楊家一日冰山倒。君看荒塚饒荊棘。當年俱有回天力。勸君對酒且高歌。莫負庭前芳草色。

有所思

雙星熒熒隔秋水。秋入城頭漏聲裏。窗間梧桐風瑟瑟。青鳥南飛月華白。朱絃一撥意已傳。夢繞博山雙紫煙。藕絲易脫雲易散。十二碧峯秋雨前。

短歌行

苦霜凋綠華。耿耿抱香死。快刀割直絃。一斷不可已。翠袖弓鞋雙黛眉。香輪回首淚沾衣。采雲一散無消息。惆悵綠鬢生雪絲。

登臨篇

登高邱。臨清流。驚濤拍岸風蕭颯。東奔到海何日休。浮生聚散類萍梗。滿地花草凝閒愁。士雅空繫大江

楫。仲宣復上荆南樓。日落蒼梧思帝子。風生蘆葉按伊州。富貴豪華成莽蒼。斜月窺林影千丈。誰家金鴨草猶黃。舊日歌臺人竟往。舊人已往新復來。仍張寶瑟勸金杯。流魚偶與水相得。長嘯不知山欲摧。鬢毛未白心成灰。城南嘯烏聲絕哀。仰天奮頓一起舞。踢碎石濠千古苔。

清夜遊

宮夜泠泠月華白。嬌騎踏空紅墮雪。西園門外馱鼓聲。十六院中樂齊發。楊郎蕭郎各一席。千牛鬣臂宮娃泣。坐中誰是陳宣華。寶帶猶拴同心結。菱荷風柔酣海霞。錦繪綳樹嘒雙鴉。侍臣自舞王自歌。蜥蜴香銷金縷紗。佛經僕射呼不起。梁燕才人竟冤死。潼關烽火照宮紅。猶自心輕漢天子。龍舟翩翩蔽白日。醉擁笙歌南下疾。一聲悲鐸不堪聽。至今江柳生愁色。

斌媚謠

斌媚復斌媚。不道李與桃。阿嬌十四著繡袍。錦襦雙佩并州刀。自從貞觀見天子。宮粧靚麗朱鞋高。親挑佛燈誦佛語。邂逅君王淚如雨。未央前殿恰垂簾。白馬道場齊抱杵。提兵誰遣太法師。縛賊親煩長公主。大雲經梵不足聽。天堂火發延御屏。雨露新歸奉宸監。浮屠鬼戰金輪庭。李花不開媚娘舞。骨肉不如巖下土。

有所思

東風二月揚新沙。憶醉燕南豪士家。狂歌劇舞共春色。正值東隣桃始花。情深每厭箏笛聒。意放不遣山林遮。船頭詩篇船尾酒。解纜直下清溪涯。太原喬生興踔絕。偏愛漁蓑冒風雪。杯空正自吸流泉。月出先判宿巖穴。封龍山人意原苦。坐覺悲風起尊俎。鬢星豈乏長安塵。衣斑尙帶西湖雨。百年離合江上雲。萬事紛紜江水紋。千里夕陽春草綠。停雲空憶鮑參軍。

送伍朝信守甯波

官柳風柔拂酒盞。渭北江東意何限。五馬誰驅高蓋車。畫省秋雲猶滿眼。纍纍肘印腰帶黃。太守年纔三十強。閭門不敢鳴騶過。里中長者多父行。高堂日遲采衣舞。一觴一詠聲琅琅。紫薇鉅公顏色揚。諸孫繞膝兒繞牀。牀頭經史映簪笏。膝下歡娛殊未央。親恩君寵兩磅礴。膏雨還隨使車落。深村無吠龍。公府多神雀。愛月還登鎮海樓。尋幽或到燒丹壑。鏡川幾曲春澄澄。人言使君如水清。棠陰無事坐舒嘯。惟聽江聲雜鳥聲。

新雪

雪意已崇朝。凌風葉旋飄。著衣初點點。入竹故蕭蕭。翠壁誰凝望。青帘久費招。期君坐今夕。燒燭看瓊瑤。

遊北寺亭上人後園

偶爲尋詩出。穠華觸眼新。鳥歌行酒地。花覆倚欄人。風籟渾無譜。蟲書太逼真。絕勝絃管夜。紅袖舞香塵。

喜晴

幾日多風雨。新晴乍可憐。青山當屋角。白鳥到花前。埽榻祛塵夢。揮毫著短篇。不須登漢閣。有思欲淩煙。

同陳宗之諸同年飲雞鳴山憑虛閣時羅太常景鳴作倡

二月到金陵。秋山始一行。人間無此地。坐上得清卿。痛飲平生侶。高樓萬古情。蓬萊在何處。縹緲暮聞笙。

五日

角黍千年恨。魚龍五日驕。湘潭如可作。楚調不辭招。落日明帆影。南風暗柳條。賈生心自壯。安用羨乘潮。

易州道中

西風羸馬經行地。易水長城是舊都。壯士入秦名尙在。客卿歸趙勢全孤。高臺歲久黃金盡。古塞秋深白雁徂。聞道關門猶鎖鑰。太平天子慎防胡。

春暮見鶯

百花開盡聽鶯流。一轉能添數種愁。巧舌傍人何太苦。春光隨水已難留。心驚陌上誰家笛。夢破城南少婦樓。柳色萬行聽不斷。莫牽詩思到揚州。

早朝追和匏老韻

蓬萊宮闕玉爲橋。曳履年年侍早朝。鑪竈著衣如過雨。御溝搖月欲生潮。未排閭闔心猶壯。纔望金莖渴

已消。奏罷從容過東觀。五雲隱隱聽笙簫。

天寶宮詞

龍池樂上練裙飄。珠履金璫稱舞腰。舞罷芙蓉冠欲墮。殿頭傳旨賜含消。

唐武宮詞

宜春苑外兔初肥。長從君王射獵歸。一色赭袍飛兩騎。外人不辨是賢妃。

蒲觴曲

蒲梢短短半厭水。藕芽白白應滿池。夏蟲葉上相思字。苦竹叢中腸斷詞。

七夕

七月七夕風雨多。御橋南望水增波。鴛鴦自向沙頭宿。不管牛郎信若何。

蔣冕二首

冕字敬之。全州人。成化丁未進士。選庶吉士。授編修。歷中允。諭德。侍講學士。少詹事。擢吏部侍郎。改掌詹事府。典誥敕。遷禮部尚書。兼文淵閣大學士。參預機務。進武英殿大學士。加太子太傅。少傅。改戶部。進謹身殿大學士。乞休。落職閒往。隆慶初復官。謚文定。有湘皋集三十三卷。

田按文定嘗著瓊山詩話。專紀邱文莊詩。相樂遠過瓊山。詩則未逮也。

元夕應制

四海春風共一家。韶光先到上林花。星橋曲曲通銀漢。火樹叢叢結綵霞。佳氣煖浮雙鳳闕。瑞煙晴護六龍車。繁華不作揚州夢。一曲昇平月未斜。

望君山

潛蘭江芷入秋多。望裏君山恰一螺。欲向老髯求鐵笛。夜深吹徹洞庭波。

毛紀三首

紀字維之。掖人。成化丁未進士。選庶吉士。授檢討。歷修撰。侍讀。諭德。侍講學士。進學士。擢戶部侍郎。改禮部。再改吏部。拜禮部尚書。典誥敕。掌詹事府。兼東閣大學士。參預機務。加太子太保。改文淵閣大學士。進少保。戶部尚書。武英殿大學士。再進吏部尚書。謹身殿大學士。乞致仕。追論議禮奪官。以恩詔敘復。贈太保。諡文簡。有鼇峯類稿二十四卷。

田按謝文正致仕復起。以楊文襄不爲之下而歸。費文憲復起。毛文簡有推讓名。次疏云。臣加少保。偶在宏先。僉議謂臣列銜立班。宜居其上。竊惟宏加秩雖在臣後。而宏入閣則在臣先。宏學識才猷。過臣甚遠。恐不可概以爵鈞論也。庶幾可以愧躍進者。小詩亦有清致。

銅雀硯

荒臺野燒青。古瓦寒雲滴。卻把蘸詩毫。東風弔赤壁。

聽松卷子

蒼苔白石坐開顏。盡日無塵鶴夢間。起向前溪一洗耳。濤聲隨雨落空山。

題畫

峯前薜路石繁迴。深樹柴扉面水開。城市看山多向畫。幾人身到畫中來。

吳廷舉二首

廷舉字獻臣。梧州人。成化丁未進士。除順德知縣。遷成都同知。改松江。擢廣東僉事。歷副使。劾中官逮繫獄。戍雁門。赦免。擢江西右參政。乞休。起廣東右布政使。召爲右副都御史。遷工部侍郎。改兵部。南工部。戶部。遷右都御史。巡撫應天。進南工部尙書。諡清惠。有東湖奏疏。西巡類藁。

列卿記。廷舉作詩效陳白沙。

國史唯疑吳廷舉。初請從李獻吉學詩。音響不諧。爲所哂。怒相排抵。免官去。後顧疏薦李。余誦李放歌云。東湖子。君非渙。忍閤沕之丈夫。余亦豈卑卑與世而浮沈。恂復共闢非庸劣。廉閤終投萬古欽。吳亦報之詩。夫旣觀顏面。豈不懷素心。如何異同論。三兩相參差。蓋兩公皆偉人。負氣不下。微生睚眦。旋消釋久矣。

送李世卿還楚

文章伯仲歐陽子。道德平交李老君。歸去大崖了何事。坐分江月看山雲。

宿玉蟾寺

川北湖南一水通。生涯半寄祝融峯。此身尙逐雲來往。又挂玉蟾山上松。

陳鎬一首

鎬字宗之。南京欽天監籍。本會稽人。成化丁未進士。授禮部主事。改南吏部。歷郎中。出爲山東提學副使。歷江西參政。進湖廣布政使。以平賊功。就遷右副都御史。巡撫湖廣。謚清肅。有矩菴漫稿。續金陵瑣事。矩菴陳公。鄉邦麟鳳。有矩菴集。余求之三十年不得。偶遇古巖顧司理案頭。見矩菴詩一卷。錄之以寄景仰。謁定山云。定山今在眼。夫子道云亡。朝著功名薄。郎曹髮髮蒼。青天知出處。白壁愛文章。無限停驂意。蘋花遶澗香。

遊靈巖

予豈邱壑士。每有煙霞想。況茲佳勝地。興到成獨往。振衣一舒嘯。千古發幽賞。竹泉繞青壁。霧雨翳林莽。超然會夙心。斯巖信蕭爽。

楊廉一首

廉字方震。豐城人。成化丁未進士。選庶吉士。授南戶科給事中。改刑科。再改南兵科。歷南光祿少卿。太僕少卿。順天府尹。擢南禮部侍郎。進尙書。贈太子少保。謚文恪。有月湖集四十八卷。

題畫

山高逕路微。林深茅屋小。讀易者何人。焚香坐清曉。

王鴻儒六首

鴻儒字懋學。南陽人。成化丁未進士。授南戶部主事。歷員外郎中。出爲山西僉事。進副使。謝病歸。起國子祭酒。再起南戶部侍郎。改吏部。進南戶部尙書。卒諡文莊。有凝齋集九卷。

田按尙書以名德重。頗稱好事。嘗獲陳后山集。鏤版行之。詩亦清俊不凡。

襄陵分司

遊歷關河迹似萍。塵襟到此頓然醒。萬竿綠玉真淇澳。一點青螺小洞庭。魚藻浮游時近檻。鶯花爛漫好開櫺。水南居士今陶謝。恨欠新詩落素屏。

自嵐縣至興縣

自將行李出井門。此地真堪一斷魂。樵牧徑荒惟有寺。逃亡屋壞不成村。澗堆墜石灘聲壯。峯過閒雲樹色昏。洞口薜蘿含夕照。虛疑世外有乾坤。

京華秋興

鵲鵲高寒紫殿陰。金壺銀箭夜沈沈。洞簫賦美當誰賞。紈扇詞工謾獨吟。暫狩長楊沿漢制。終思茂草戒虞箴。屬囊猛士應多從。傾耳西風玉輦音。

至後三日雨連日

江南冬月氣猶溫。風雨瀟瀟至後繁。鍾阜雲迷禪寺塔。秦淮潮上酒家門。閒來訪戴難乘興。老去遊吳易斷魂。何似鄉關醉呼騎。短衣衝雪獵平原。

擬楊鐵崖小遊仙詞二首

酒壚客舍已塵埃。憶與回公舊往來。鐵笛一聲塵夢醒。岳陽樓下水如苔。戲拋白鳳下青冥。黃鶴樓頭雨正晴。十八女郎歌勸酒。人間誰識是龍精。

吳儼一首

儼字克溫。宜興人。成化丁未進士。選庶吉士。授編修。歷中允。侍講學士。掌南翰林院。以忤劉瑾罷官。瑾誅復職。擢南禮部侍郎。進尚書。贈太子太保。諡文肅。有摘稿四卷。

四庫總目。儼當何李。未出以前。猶守明初舊格。無鉤棘塗飾之習。其才其學。雖不及李東陽之宏富。而文章局度。春容詩格。亦復閑雅。往往因題寓意。不似當時臺閣流派。沿爲膚廓。雖名不甚著。要與東陽肩隨。亦足相羽翼也。

聽鄭伶琵琶

鄭伶名價重江東。五百梨園伎盡空。子夜猿啼殘月白。上林鶯老落花紅。江頭商婦愁無限。塞外明妃恨不同。可惜曹綱今去遠。何繇兩市門西風。

羅玘二首

玘字景鳴。南城人。成化丁未進士。選庶吉士。授編修。歷侍讀。南太常少卿。進本寺卿。擢南吏部侍郎。引疾歸。嘉靖初。諡文肅。有圭峯集三十卷。

藝苑卮言。黃五獄省曾言。南城羅公玘。好爲奇古。而率多怪險。餽之辭。居金陵時。每有撰造。必棲踞於喬樹之巔。霞思天想。或閉坐一室。客有於隙間窺者。見其容色枯槁。有死人氣。皆綏履以出。都少卿穆。乞伊老墓銘。銘成。語少卿曰。吾爲此銘。瞑去四五度矣。今其所傳圭峯稿者。大抵皆樹嶺死去之所得也。

國史唯疑圭峯山輪粟入監。年四十餘。祭酒邱文莊公。議南士不聽北留。羅固請至再三。受扑不挫。而敷之曰。若能識幾字。輒強乃爾。大聲應曰。唯中祕書未讀耳。邱異之。識其名堂柱。再試文奇甚。六館士莫有及者。驚嘆爲延譽於朝。遂以其年發解。聯第。蔚爲名儒。

田按景鳴鄉舉。出西涯之門。西涯依違劉瑾。景鳴寄書責之云。屢更變故。雖營貢書。然不敢頻頻者。恐彼此無益也。今則天下皆知忠赤竭矣。大事亦無所措手矣。易曰。不俟終日。此言非歟。彼朝夕獻諂。以爲當依依者。皆爲其身謀也。不知乃公身集百訴。百歲之後。史冊書之。萬世傳之。不知此輩亦能救之乎。白首老生。受恩居多。致有今日。然病亦垂死而不言。誰復言之。伏望痛割舊志。勇而從之。不然。請先削門生之籍。然後公言於衆。大加誅伐。以彰叛恩者之罪。生亦甘焉。此書可以報舉主矣。景鳴文章綽有矩範。詩非所長。作文至瞑去四五度。劉彥和文章傷命之戒。諒哉。

送萬典史之黃岡

城腳更無地。門開直到江。縣樓對魚市。驛舍接船窗。鳥立藏蛇竹。蟻緣繫馬椿。聽琴還聽笛。不是故園腔。

和江殿讀齋居韻

漠漠昏鴉飛遶堂。抱欄吾恰到西廊。謾拈短燭尋詩壁。笑見斷甃支敵牀。家遠青山難入夢。時清白首好爲郎。不慚衰朽迎歸蹕。貪看艤航集萬方。

傅珪一首

珪字邦瑞。清苑人。成化丁未進士。選庶吉士。授編修。歷中允。諭德。降修撰。尋遷中允。歷侍讀學士。翰林學士。擢吏部侍郎。進禮部尙書。致仕。嘉靖初。追贈太子少保。諡文毅。有北潭集八卷。

田按邦瑞在正德朝。遇事直言。權倖側目。矯旨致仕。杜門謝客。足迹不至郡。闢園城西。蒔花木。日與親舊飲酒賦詩爲樂。郎山葛洪山皆郡之勝。攜客往遊。峻絕幽邃。人所不至之地。皆留題而去。

元宵應制

宵夜香生輦路塵。蓮花如錦月如銀。君王別有光明燭。遍照窮檐蔀屋人。

李文祥一首

文祥字天瑞。麻城人。成化丁未進士。選庶吉士。以言事謫咸甯縣丞。旋用薦。召爲兵部主事。坐事下獄。貶興隆衛經歷。經商城。渡冰陷死。有儉齋遺稿。

堅瓠集。成化中。萬安子翼登進士。官至侍郎。翼子宏璧。成化丁未。復倖僞。麻成李文祥。爲其同榜。貢才名。將對大廷。安欲以宏璧託之。因許及第。使延別館致款。屬題畫鳩。文祥奮筆題詩。有春來風雨尋常事。莫把天恩作己恩。句。安銜之。弘治初。有媒孽文祥者。謫興隆衛經歷。李西涯贈詩。戒酒不從。花底醉。愛舟多在水中居。後文祥被酒過河。冰陷溺死。人以爲讖。

登岳陽樓

萬家煙火擁孤城。一上高樓百感生。往事悠悠東下水。夜船燈火枕江聲。

鄒智一首

智字汝愚。合州人。成化丁未進士。選庶吉士。坐誣下獄。謫石城所吏目。有立齋遺集五卷。

四庫總目。智詩文多發於至性。不假修飾之功。

雙槐歲鈔。鄒吉士汝愚。謫雷州千戶所吏目。道吾廣。有司留館坡山。士民爭先謁焉。其同年蒼梧吳獻臣廷舉。尹順德。令邑民李煥。於古樓村建亭居之。扁曰謫仙。弘治辛亥十月卒。獻臣往治其喪。適方伯東山劉公大夏至邑。不暇出迎。廉知其故。反加禮待。共資郵還其喪。獻臣自是知名。白沙陳公甫。追次汝愚詩曰。遷客一亭遺海濱。當時誰號謫仙人。花汀柳市無疆界。盡是乾坤一樣春。獻臣和曰。浮雲浩浩南海濱。落月獨照窮愁人。狼藉幾株桃李樹。謫仙亭上可憐春。

辭朝

雲韶聲靜拜彤墀。轉覺心驚不自持。罪大故應誅兩觀。網疏猶得竄三危。盡披肝膽知何日。望見衣裳只此時。但願太平無一事。孤臣萬死更何悲。

靜志居詩話。立齋以吉士建言。請黜萬安。劉吉。尹直。三小人而進用王恕。王竑。彭韶。三君子。泰陵初政不報。既而萬尹被彈事去。劉獨銜憾刺骨。嗾其黨攻吉中書人。湯御史。鄒辭連立齋。及劉嘉州。概李主事。文祥。董河陽傑。謂數人以詩酒相結納。互相標榜。詆毀朝政。概貽鄒書云。夜夢一人騎牛將墜。鄒手挽之不仆。又見鄒執五色石。引牛就道。人騎牛者朱也。以爲鄒將有扶持社稷之力。法司周內坐以妖言惑衆。律罪當死。賴王端毅。何文肅。徐文靖。諸公力持之。得生而立齋還謫化州千戶所吏目。

既踰嶺。從陳文恭講學。未幾天折。惜夫。其獄中詩云。人到白頭終是盡。事垂青史定誰真。夢中不識身猶繫。又逐東風入紫宸。誦者傷之。至辭朝詩云。望見衣裳只此時。放臣逐客讀之。尤爲悽斷。

李堂二首

堂字時升。鄞人。成化丁未進士。授工部主事。歷員外郎中。遷應天府丞。南光祿寺卿。擢南左僉都御史。召爲工部侍郎。總理河道。引疾歸。有堇山集十五卷。

東錢湖絕句二首

深山何事仆穹碑。石穴金丸禍已隨。莫歎師王空一柳。穆陵遺事更堪悲。
楚王宮殿七浮圖。殿址層層漫綠蕪。幸有老松人不翦。滿林落日正嘯烏。

夏鏹四首

鏹字德樹。天台人。成化丁未進士。謁選入都。疏請復李文祥。鄒智官。罷劉吉。忤旨下獄。尋釋。除大理寺評事。有赤城集二十三卷。

田按德樹以謫論著。詩亦迥不猶人。

東關歸路

七舍東關路。還家卽勝遊。水清如擁鏡。山好只移舟。江唱曹娥晚。嶺謠天姥秋。途窮鄉語入。台越此分州。
春日紀遊

相尋出郭消憂地。不近山樵近澤漁。細水隨行人箇箇。晴沙擁坐柳疏疏。林鶯起徙雙歌罷。市酒提攜一笑初。讌徹杏園仍浪迹。不才多病欲何如。

立春日白齋所居作

故園春風又一吹。脈脈還來動酒卮。豈少梅花笑幽處。更饒江色弄晴漪。衰遲正苦鄰人遠。懶惰偏宜俗子嗤。接笑暫同三徑裏。柴門竹影共移時。

官舍對菊

雨墜黃花豔。晴軒漆几幽。但看無意採。不是故園秋。

楊子器一首

子器字名父。慈谿人。成化丁未進士。知崑山、高平、嘗熟三縣。擢吏部主事。歷員外、郎中。出爲湖廣參議。遷河南布政使。有柳塘先生遺稿。

都公譚纂慈谿楊名父子器爲詩敏捷。下筆數百言。不屬草。一日余與楊君謙同會。名父滿臺立成數律。君謙曰。君之才敏捷。堪奉使外國。足以驚倒夷人。名父曰。吾詩不行於中國。僅可驚番人乎。相顧一笑。

元順帝宮詞

練槌髻髻紫頭繩。金繡雲肩翠玉纓。學舞天魔纔擺隊。長安又領接番僧。

周旋一首

旋字克敬。慈谿人。成化丁未進士。授兵科給事中。出參廣藩。有西溪小稿。

秋思

倚杖獨行吟。蕭條楚客心。寒潮侵曉岸。商籟響秋林。俠氣老猶壯。窮愁閒轉深。彷徨凝望久。西北起輕陰。

盧濬一首

濬字希哲。天台人。成化丁未進士。授刑部主事。歷員外郎。中出知黃州府。改南安。邵武。有渺粟稿。

黃州集

九日遣興

江南鴻雁隨雲沒。江北黃花冒雨開。客裏光陰年似月。眼前愁緒去還來。誰將玄髮看庭樹。且對青山促酒杯。一笑樊籠吾分在。錯教鷗鳥浪相猜。

文森一首

森字宗嚴。長洲人。溫州守林弟。成化丁未進士。知慶雲縣。改鄆城。擢浙江道御史。建言廷杖致仕。起爲河南道御史。遷南太僕少卿。擢右僉都御史。有中丞詩集。

邵伯道中

去日流火來肅霜。兼葭大澤鳴鵝鶻。蟄龍已臥忽人立。遠山將盡如眉長。古寺斷碑羅隱偈。碧灣丹樹謝公棠。舵樓北望風煙直。好共乘春早雁翔。

陸完一首

完字全卿。長洲人。成化丁未進士。除監察御史。出爲江西按察使。擢右僉都御史。巡撫宣府。改南院督江防軍。召爲僉都御史。遷兵部侍郎。進右都御史。加太子少保。改左都御史。拜兵部尙書。改吏部。坐納宸濠賄論死。議平賊功減死。戍福建靖海衛。有水村集。

王元章梅

月落參橫興已空。鑑湖清淺夜推篷。消磨不盡惟豪氣。猶在疏花淡墨中。

林光一首

光字緝熙。東莞人。成化己酉舉人。除平湖教諭。遷國子博士。改襄陽府長史。有南川集。

石門

遠水接長隄。疏松遶斜谷。入寺不逢僧。一犬吠深竹。

明詩紀事卷十

丙籤

姚綬四首

綬字公綬嘉善人處士黻子天順甲申進士授監察御史謫永寧知縣有穀菴集十卷

楊循吉松蘿堂集姚公綬解官歸所居在大雲里東饒水竹作室曰丹邱嘯咏其中人稱丹邱先生又作滄江虹月之舟遊泛吳越間善書法鍾王勁婉咸妙畫初學水墨後進學唐品得古意

四友齋叢說嘉興姚雲東工詩喜畫善臨摹其臨趙松雪王叔明二家畫墨氣皴染皆妙閒寫梅道人竹石亦蕭洒可愛

六硯齋筆記姚雲東小景好作沙汀水曲孤釣獨吟其闊幅重林遠汀著四五漁船而已此公壯歲入中臺不及攬轡驂鸞晚年好道向平之願蚤畢三山五嶽之履懸而未試直以逸趣自寫胸中而已未可以文沈作略概之也

書史會要姚綬書類張伯雨

攜李詩繫穀菴詩頗清麗不著一塵書畫妙絕一時期號穀菴又號雲東子蘭臺逸史天田老農上清仙吏嫺仙仙癡紫霞碧月翁並著人間唯丹邱先生爲尤顯平生慕張貞居之爲人所見片紙隻字無不收藏嘗得其鐵冠與遺像爲撰句曲外史小傳鐵冠歌云昔爲柱史冠鐵冠螭頭岬立霜風寒歸來野服山林下不類錢然鐵冠者句曲外史人中仙此冠已餘二百年纏斑蝕鐵鐵欲穿棱棱巧製銅色妍黃篋樓中想應貯玉鈎樓邊傳行處二儀三綱浪得名竹籜鹿皮無此清芙蓉吐花金玉井鐵葉細薄不易成外史星壇月明夜醺禮茅君鶴曾借出塵風度向誰彈坐看瑤池碧桃謝予號逸史雲之東髮已種種今成

翁冠乎冠乎磨冷鐵。今鐵曷能如古烈。君不見古鐵性烈今不如。作冠甯住仙人屋。流落四海幸屬予。著之稱我青霞裾。
田按雲東逸史。畫勝於書。書勝於詩。

桐邨小隱詩和韻

河流南入市。徑路北通村。新結草堂好。舊栽桐樹繁。兒童知稼穡。鷗鳥識琴尊。有客問奇字。乘舟直到門。
錢舜舉山居圖過語兒溪賦

舟中賴此能消日。半匹溪藤意趣多。雪叟畫圖凌晉宋。貞居詩語逼陰何。山回樹繞門空設。雨過風輕水不波。誰個躋攀窮險阻。一聲長嘯出煙蘿。

田按錢舜舉浮玉山居圖卷。紙本。七分用墨。三分設淺綠色。筆法絕類輞川。有黃公望倪雲林顧阿瑛仇山村鄭元祐楚石道人諸題跋。舜舉自題云。瞻彼南山岑。白雲何翩翩。下有幽棲人。嘯歌樂徂年。覆石映清泚。嘉木澹芳妍。日月無終極。陵谷從變遷。神襟軼寥廓。興寄揮五絃。塵影一以絕。招隱笑足言。張貞居於至正戊子。得於書肆。託爲景趣。既高筆墨精妙。詩亦雅麗。非近人語。和韻云。秋風動巖樹。歸鳥何其翮。我思巖中人。可以樂忘年。夫君乃詞客。畫手故作妍。吳興圖畫藏。詎隨時好遷。上巖雲積雪。下巖水鳴弦。展卷幾尺許。坐對兩無言。成化癸卯。公綬得此卷於瑣溪沈氏。驚爲至寶。題詩至廿餘首。此詩其一也。後又歸項墨林天籟閣。國朝康熙中。此圖爲安儀周所得。著錄墨緣彙觀。安氏中落。購入內府。光緒甲午。此圖復流落人間。余獲見舜舉山居圖二。一爲二紀題者。係金碧山水。一爲此圖。以淺綠和墨。靜穆之趣。超乎塵表。五百年來。無此作矣。題爲浮玉山居者。以鄭逢昌題有餘不之水浮玉山句也。此圖亦著錄卞中丞式古堂書畫考。

脩竹仕女圖

瑤臺無信託青鸞。一寸芳心思萬端。莫向東風倚修竹。翠衫經得幾多寒。

題畫

秋風吹空古樹葉。白雨壓低新竹枝。淨埽石牀看暮色。滿襟涼影鬢絲絲。

李應禎一首

應禎名姓以字行。更字貞伯。長洲人。景泰癸酉舉人。授中書舍人。遷南兵部郎中。尙寶司卿。太僕寺少卿。有李氏遺集。

甫田集。太僕書魏府君碑。謂微明曰。吾學書數十年。今始有得。然老無益矣。子其及目力壯時爲之。因極論書之要訣。凡運指凝思。吮豪濡墨。與字之起落轉換。小大向背。長短疏密。高下疾徐。莫不有法。公雖潛心古法。而所自得爲多。其尤妙能三指尖擗管。虛腕疾書。今人莫能及。

藝苑卮言。少卿書人有求者。多怒不應。故傳世者少。書史會要。少卿眞行草隸。皆清潤端方。如其爲人。文震孟姑蘇名賢小記。范菴公入太學。中官牛玉聞其名。延爲弟子師。公不往。以善書選中書舍人。故事中書班列給事御史上。近輒易其次。公上書爭不報。中旨詔諸舍人書佛經。公言天下國家有九經。未聞佛經也。上恚。廷杖公幾死。致仕歸。郡守劉某征歛苛急。人呼白面虎。公作虎渡河詩致之。公博學能詩。書法自成家。然每恥以是名。清羸果毅。侃侃終始。眞吳人士之神矧已。

和邱時雍太守

解印歸來草結菴。逢人便欲口三緘。鬢將半禿甯忘世。骨未全消尙畏讒。別墅貯春常載酒。晴湖泛月不

張帆年時種得梅千樹。要看花開雪滿巘。

周鼎四首

鼎字伯器。嘉善人。以軍功授沐陽典史。有桐村、疑舫齋、土苴等集。

南濠詩話。柯博士九思。在奎章日。得出入內廷。後失寵。退居吳下。虞文靖公作風入松詞贈之。中亦微露此意。予聞柯嘗畫黃鸝白頭。題詩二絕。白頭云。春濃不放小禽棲。白髮衝冠向曉嘶。簾幕半開人未起。樓臺風煖日猶低。黃鸝云。春風嬌軟綠陰肥。上苑鶯花紫翠圍。卻向後宮深院裏。一枝閒自理金衣。近嘉興周丈伯器嘗題二圖。爲子誦之。詩云。奎章閣下老詞臣。吟徧鶯花上苑春。回首金衣閒自理。綠陰多處少風塵。重重羅幙護輕寒。聽徹春禽午夜關。無限江南歸興裏。不將華髮漫衝冠。蓋用其語而反其意也。

弇州四部稿。伯器書。結法蕭灑。

田按。伯器工書善賞鑒。名人書畫。往往見其題跋。小詩亦有風致。

留別張廷端

野亭芳樹下。崖石大溪南。客去閒秋色。雲來作暮嵐。誰家留信宿。何處倚清酣。拾得琅玕竹。時時寄一函。

晚坐

胡牀高柳下。團扇入懷新。笑指纖纖月。蛾眉學未真。

寄叔莊

郭外何須二頃田。江湖春水綠如煙。扁舟蕩漾不歸去。日暮蘋花風滿川。
漁村

湖上吹煙一縷輕。隔林聞得紡車聲。漁村風景偏宜晚。幾幅斜陽透網明。

林景清二首

景清號竹窗。閩人。成化中貢生。官興國州判。

歷代詩選。徐興公云。竹窗雅善草書。吾鄉自永樂中。王太史孟揚工於八法。繼孟揚者竹窗也。書法之妙。不減吳興。

寄陳野航

明月光沈水底天。野航常傍荻花前。山翁吟罷如泥醉。一枕江風自在眠。

一清軒感舊

往事淒涼似夢中。香奩人去玉臺空。傷心最是秦淮月。還對秋閨燭影紅。

金琮一首

琮字元玉。上元人。自號赤松山農。

金陵瑣事。山農金元玉書。初法趙子昂。晚學張伯雨。精工可愛。落筆人便持去。吳中文徵仲極賞之。凡得片紙。裝潢成卷。題曰積玉。畫梅花。有逃禪老人筆意。自題絕句云。一別西湖未得歸。孤山風月近何如。春來賸有看花興。又向君家寫折枝。

顧起元客座贅語。金元玉嘗游浙之赤松山。愛其佳。徘徊不能去。因自號赤松山農。居常遐視清嘯。人莫能窺。王公貴人。雅相傾慕。非先施。未嘗一至其門。

辛丑消夏記。蔡之定云。赤松銳於臨池。每夜作書。以五寸燭爲度。燭盡而止。其勤如此。其書品在莫雲卿最大年之上。

駐景亭春日漫興

幾日春陰嬾出城。不知時節近清明。青春公然背我去。白髮忽欲滿頭生。殘酌自來池上了。好詩偶在雨中成。南原明日開晴色。到處看花約伴行。

蔣文藻二首

文藻名元素。以字行。嘉興人。

六硯齋筆記。蔣文藻林塘。與姚丹邱同隱大雲。執師資之禮。書畫步趨丹邱。有酷肖者。所作叢竹老木。尤蒼勁有致。人或以文雅稍怯。輕之。然亦有樸野真率。不失山林氣味者。

野步過田舍留飲

吳蠶上簇桑柘空。薔薇花開村徑紅。野夫飽食一無事。緩步小橋西復東。黃鸝綠陰嘯不歇。路轉卻逢田舍翁。殺雞留飲話疇昔。葦箔稍稍來南風。

偕丹邱先生過蕭山竹林寺醉題壁間

門徑蕭蕭竹半池。喜逢新夏亦秋時。長林不臥嵇中散。古字猶存張卽之。潮打山城鐘渡水。雨飄經閣燕

妨兒一尊除卻真閒事。醉裏瞿曇是阿師。

盧儒二首

儒字爲己。崑山人。天順初中書舍人。有重齋稿。

永東日記。盧重齋博學能文。善筆札。文學韓柳。書學歐顏。自負甚高。時流罕及。

梅花草堂集。盧爲己勤學有文。頗自負。人有請其稿者。輒捧腹曰。彼中有筭。卒難相盡。以薦拜中書舍人。時備顧問。上嘗命作雪賦。頃刻立就。盡屈其同事者。

樂靜爲謝庭循賦二首

宴居坐軒屏。翛然愜情志。竹樹搖清風。淅瀝生幽思。埽花惜春還。留尊須客至。昨與靜者期。山中話幽事。靜觀人間世。萬化相尋繹。百年條能幾。而不養心迹。垂簾閉深清。滿庭芳草積。啼鳥時一聲。山窗破幽寂。

朱應祥二首

應祥字岐鳳。松江華亭人。成化中貢生。有鳳山稿。

陸深儼山詩話。鄉前輩朱岐鳳。敏於辭翰。爲一時所驚服。

雲間雜識。點易臺。朱鳳山應祥讀書之所也。朱性迂狂。嘗謂錢文通公曰。予在點易臺讀公詩。至不善處。恨不得長竿一擊公頭。放言若此。書史會要。應祥博學工詩。善行草。

梅花道人墓

梅老清風不可招。橡林寒日雨蕭蕭。武塘一曲煙霏外。山寺鐘聲落暮潮。

麟溪道中

一川流水半村花。舊屋南隣是釣家。長記歸篷載春釀。雲籠殘照雨鳴沙。

朱存理三首

存理字性甫。長洲人。有野航集。

甫田集。性甫詩精工雅潔。務出新意。得意處追躡古人。

四友齋叢說。野航詩門老儒。在荻扁王氏教書。與主人晚酌罷。主人入內。適月上。野航得句云。萬事不如杯在手。一年幾見月當頭。喜極發狂。大叫扣屏。呼主人起。咏此二句。主人亦大擊節。取酒更酌。明日更請吳中善詩者賞之。大爲張具。微戲樂。留連者數日。吳中留事。其風流致足樂也。

祝聖金石契。性甫書國晉戶。吟升宋堂。

續吳先賢贊。存理工篆籀。

靜志居詩話。性甫晚年摹刻已詩疏曰。嘔心少日。已無錦囊之才。流淚終年。空有碧雲之嘆。髮白因其搜索。雌黃我推敲。抹去若干。存來十一。欲望收拾。在後子孫。莫若流傳。先自朋友。其情甚爲可憫。祝希哲贈詩云。書抄滿篋皆親手。詩草隨身半在舟。沈啓石題稿云。雖止百篇。諸體備。不拘一律。大方諸。惜乎其稿罕傳矣。

田按。性甫好藏書。手自鈔錄。精緻不苟。又好硯。鑒別書畫。自記謂消除歲月。惟品硯。借書。鑒畫。三事而已。所輯鐵網珊瑚。萬歷時爲常熟趙琦美所得。增錄數卷。雍正中。年希堯鑲板行之。又珊瑚木難八卷。至今好事家。多有鈔本。元季明初。吳中舊俗。好

古之士多以文史自娛。南園俞氏、笠澤盧氏、廬山陳氏、書籍金石之富，甲於海內。景天以來，若葉文莊、吳文定、都元敬、杜東原、邢憲齋、沈石田、文徵仲、錢孔周、閻秀卿、戴章甫、趙與哲之流，多手自鈔寫，流播人間。余嘗謂博雅收藏，海內多有，若手自鈔錄，精冊名編，此吳人獨絕者也。

人日卽事

新雪生寒曉欲消，河冰漸解晚生潮。庭禽初哢先聞鵲，園卉將萌未及蕉。故事題詩聊歲歲，野人行樂自朝朝。從渠寂寞如顏巷，漫有春風酒一瓢。

垂虹橋送戴明甫歸休甯

寶帶秋波啟別筵，垂虹晚日送行船。白雲似與越山隔，明月還同吳地懸。後夜相思各杯酒，來年重會賸詩篇。殷勤再寫橋頭景，江冷丹楓歲暮天。

九日松下

松下行行二三子，書聲白晝草堂開。老夫把卷仍自讀，舊雨到門今不來。苔石無塵棋局在，莎汀有水釣船回。秋風籬落偏蕭索，獨嗅寒花持酒杯。

明詩紀事卷十一

丙籤

秦旭 七首

旭字景陽。無錫人。有修敬先生集。

田按景陽詩境閒適。讀之令人意遠。成化壬寅。與陸勉應成。高直惟清。陳履天澤。黃祿公福。楊理叔理。李庶舜明。陳應行之。施廉彥清。潘緒繼芳。修碧山吟社。於真山之麓。若冰澗之前。黃公澗之上。時舜明年八十九。景陽八十五。天澤八十三。應成八十二。惟清七十九。公祿七十三。叔理七十二。行之六十九。彥清六十一。繼芳年未五十。重其人。邀之入社。諸人皆一時隱君子。惟景陽以子襲貴。封江西布政使。其會惟論詩。時成有燕殺核數盤。飯一盃。酒八九行而已。中間秋林陳進之。歸自工部。冰壑盛時望。歸自都臺。景陽子襲。歸自江藩。亦時時一至。不在恆數。於時朝野清娛。從容吟宴於林壑之下。沈啓南爲之圖。邵國賢紀其事。吳苑菴寄題吟社詩云。詩壇高築壬寅歲。勝事遙傳大歷年。買地有資酬野衲。品泉無譜問茶仙。樹藏亭子清風裏。路繞雲根小洞邊。賓侶願隨諸老後。結盟遲我賦歸田。王思軒寄詩云。少遊何處開吟社。借得西神數畝山。一代衣冠追落下。千金詞賦播人間。其爲摯紳傾慕如此。

傷春詞東繼芳

去年已賦傷春曲。曾與潘郎歌斷續。細雨梨花爛漫愁。東風楊柳淒迷綠。今年又賦傷春詩。燒燈華屋雨絲絲。天公歲歲能作惡。偏在春光最好時。

寄華祖芳隱君

簾幙捲斜曛。沈香手自焚。高風振頽俗。幽思發清文。鶴外看湖草。鷗邊步野雲。年來厭形役。自愧不如君。

過玉溪山墅

衡門水木恣清華。路轉西巖隱幾家。五月涼陰千畝竹。六時清供一甌茶。行逢流水聞僧梵。吟到斜陽落磡花。自信俗緣消已盡。不勞千劫謾蒸沙。

水雲亭小酌

吏隱南塘小結亭。此心何愧北山靈。壺觴自可消孤悶。魚鳥還能慰獨醒。風景只如桃葉渡。秋光欲動蓼花汀。簷前昨夜微風起。吹落蘭蓀翡翠翎。

與懋成惟清公祿叔理舜明山行歸途有作

落梅風急放湖船。六客逍遙是散仙。雪白河豚新入饌。鵝黃楊柳未成綿。松菴相地開詩社。花市留衣當酒錢。寄語諸公慎終始。莫因勤怠誤流年。

田按松菴相地開詩社。此景陽紀首。開碧山吟社作也。社中諸人詩。附錄於此。陸懋成花朝開社句云。修竹茂林思往事。雨香雲淡屬花朝。陳天澤重陽日。社中諸老登高句云。尊前黃菊未堪把。樹杪清泉時自聲。黃公祿吟社開宴句云。酒籌不計看花飲。詩句將成爲雨催。高惟清社集詩云。池亭面面遶朱闌。每月探泉到碧山。樂事還尋諸老共。浮生能得幾時間。行廚送饌來花外。嘯鳥催詩出樹間。扶醉登舟天已暮。月明湖上放歌還。

舟中紀興

東風兩鬢雪毵毵。一枕蘭舟酒半酣。不似邵菴虞學士。杏花春雨憶江南。

題梅花菴

孤山山上月明多。長憶西湖瑤瑤坡。安得扁舟吹短笛。梅花香裏一經過。

陳懋一首

懋字行之。無錫人。有錫谷集。碧山十老之一。

題小蓬瀛軒

澗頭綠水流花淨。谷口青林送客涼。銀鶴舞空秋淡淡。玉笙吹月夜茫茫。

施廉一首

廉字彥清。無錫人。碧山十老之一。

自題山莊

深深鑿渠低覆梁。流水入戶桃花香。野人朝來足清睡。時有黃鸝過短牆。

吳文鳳一首

文鳳字以翔。歙人。

竹居自題

杲溪幽致類湘潭。一榻清陰六月寒。睡起好懷何處著。綠雲遮斷曲闌干。

甘應奎一首

應奎江甯人。成化中貢生。除嘉興訓導。改龍南教諭。

讀陶詩

淵明苦邑令。高吟歸去來。五斗腰不折。乃爲乞食哀。昨非與今是。俗子徒驚猜。南山不改色。落我手中杯。

陸潤玉三首

潤玉字尙質。松江華亭人。有夢庵集。

富林十景錄二

風驅海門潮。晴添八灣漲。老漁棹歌回。離根繫吳榜。歸舟泝橫浦。日落風更急。峭帆十幅蒲。半帶荒煙濕。

重過沙河有感

白鶴沙頭水自波。扁舟曾載夕陽過。東風一路蘼蕪綠。添得春愁別後多。

龍瑄二首

瑣字克溫宜春人僑寓金陵有鴻泥集二十卷

江西詩徵宜春龍璋以世襲武職遂爲金陵人與邱仲深羅蔡正陳公甫爲布衣交有聲江湖間自號牛間居士田按鴻泥集著錄明史藝文志詩綜未錄一字克溫爲景天間一詩家亟登之

平樂府

淒淒煙雨嶺南天。翠壁青林斷復連。山縣總荒兵火後。士民猶住賊巢邊。車筒晝夜翻江水。刀具春秋種石田。幸際時和太平日。不須雞骨預占年。

荊山鄉思

驛廳長晝思依依。坐看晴檐柳絮飛。斜日鳥呼春不住。東風雁比客先歸。山程迢遞淹征轡。野水微茫夢釣磯。卻憶舊居江口寺。雨香蘋藻鱗魚肥。

趙不踰一首

不踰字秉規順德人有迎西館集

珠海別意

落葉微霜古寺秋。行人臨發重遲留。離情未盡重斟酒。歸興都隨一葉舟。殘月斷猿江上路。夕陽紅樹驛邊樓。明朝獨倚河橋望。人自相思水自流。

劉常一首

常字世經海鹽人有武原集

青樓怨

綠楊飛絮撲簾輕。百結愁腸夜轉生。斜抱銀箏對明月。十三絃裏最關情。

祝淇一首

淇字汝淵海甯人

雜題

東風楊柳拂春隄。煙靄陰陰野鳥啼。金谷日斜歌舞散。海棠無主草萋萋。

賀承一首

承字宗振蘇州人

山居圖爲薛竹菴賦

高隱優游遠俗譁。竹籬茅屋半雲遮。山田種秫堪供釀。石澗分泉自煮茶。細草生香春正煖。長松過影日初斜。庭前更有梅兼鶴。彷彿西湖處士家。

羅頤二首

顧字儀甫。紹興山陰人。

田按山陰羅氏三世稱詩。儀甫特爲穎出。

湖上

東山志不違。幽澗尤苗肥。野樹翻鶻響。岩花撲燕飛。湖晴林岫出。水闊渚村微。笑謝紅塵客。休過阮裕磯。
送下洋客

積水連檣杳。煙濤絕域均。星杓插天漢。日月轉雙輪。地坼炎洲迴。山橫昧谷隣。岩雞半夜曉。海樹隔年春。五色翻鯨浪。三花渡鶴津。鄉心看斗近。旅夢怯潮頻。燈遠明南極。舟移按北辰。刀書蕃俗古。行說上皇民。

劉銑一首

銑字汝忠。壽光人。大學士羽子。八歲憲宗召見。除中書舍人。累官太常卿。兼五經博士。有西橋集。
國史唯疑劉文和羽子銑甫八歲召入。拜起如禮。善屬對。授中書舍人。慮牙牌觸損。以銀易之。仍不時召見。銑後博學多識。官太常卿。駕朝陵。有御制詩。用康字。諸臣屬和一律。銑獨引遺塚存康事云。成祖詔斥陵旁塚。惟留寶緒康三姓。信奇聞也。
田按汝忠早慧。年八歲。秦陵召見。除中書舍人。宮殿門高。同官楊一清常提之出入。能詩。與遼華泉何大復相倡和。惜集不傳。

同無涯大復待月次韻

一笑留君未盡歡。試呼明月此憑欄。豈應銀漢遙相隔。正恐瓊樓不奈寒。青眼百年知己在。枯桐何處賞音難。莫慚草閣荒涼甚。多少明珠照筆端。

孔克晏一首

克晏曲阜人。孔子五十六代孫。

雨後望嶧山

山色平明看。雨餘秋正濃。滿前青突兀。幾朵翠芙蓉。鳥落懸崖樹。雲開對面峯。當年頌功石。苔蘚辨秦封。

陳延齡一首

延齡初名壽。字昌年。嘉興人。景天間郡掾史。有松雲集。

早春曲

柳芽吐玉蘭芽小。羅幕凝寒覺春早。腸斷王孫尚未歸。東風已綠天涯草。笙篴塵滿瓊簫臥。熏籠閒熱沈香火。惱儂題就抱愁眠。淚滴珊瑚暗成顆。

鄭延二首

延字世昌。海鹽人。以貢授廣東市舶提舉。有存笥集。

墨竹

零亂金錯刀。參差鳳凰尾。翠影落湘潭。秋風吹不起。

回雁

片影橫斜不作行。數聲嘹唳度衡陽。夜寒沙渚清無夢。啄盡黃蘆葉上霜。

史傑四首

傑字孟哲。湖州人。大河衛百戶。有轡綫集。

沐陽郭外訪克禮

公暇多幽興。來尋處士家。柳陰晴障日。花氣煖蒸霞。地接青郊迥。門臨小徑斜。主人能愛客。汲水煮新茶。

挽陳處士

買斷溪山遠避名。白雲常日護茅亭。老來不試屠龍技。死去惟存相鶴經。階下苔痕空自綠。簾前芳草爲誰青。路人欲問平生事。光照幽阡太史銘。

過曲阜謁孔廟

巍巍萬古靈光殿。碧瓦朱甍炫彩霞。留得手栽千尺桮。綠雲長護魯東家。

贈滌上人

踏破苔花滿徑斑。遠尋蘭若向溪山。高僧自得無生趣。門掩松陰盡日閒。

李仲訓一首

仲訓號峴山。南昌人。官吏科給事中。

西皋詞

流水小橋楊柳。短牆深巷桃花。魚子晴生墨沼。鶯聲煖隔窗紗。

吳一式一首

一式字子正。東陽人。

春宮詞

百轉流鶯曉禁中。夢回驚起錦幃空。轟雷何處宮車過。獨對桃花一樹紅。

鍾禧二首

禧、南海人。

田按禧號狂客。成化間盛有詩名。張東海寄狂客詩云。狂客別來音信無。定應騎馬入皇都。嶺南儘有佳山水。莫向君王乞饌湖。

和友人招遊西湖二首

湖光山色最宜秋。君不來招也去遊。已辦蜀川千丈錦。爲誰今日盡纏頭。
萬頃西湖水貼天。芙蓉楊柳亂秋煙。湖邊爲問山多少。每箇峯頭住一年。

明詩紀事卷十二

丙籤

秦夔五首

夔字廷韶。無錫人。處士旭子。天順庚辰進士。授南兵部主事。歷郎中。出爲武昌知府。改建昌。累遷江西右布政使。有五峯遺稿。

田按廷韶爲處士景陽子。景陽結碧山吟社。廷韶與弟旦。亦稱詩。可謂一家韻事。致政歸。築五峯草堂於九龍山下。率二弟奉景陽遊衍其間。登山臨水。歌咏繼作。如是者蓋數十年。享士夫清曠之福。爲一時所僅見云。

題陳秋林畫松

千年老髯冰雪顏。欹側偃臥寒厓間。劃然悲風起長谷。化作龍吟秋滿山。太邱先生畫成癖。寫此甯吝百金直。披圖一笑成嘿然。海鶴飛來破秋色。

秋日與同官登從姑閣

野寺孤城外。登臨眼界寬。江山正搖落。樓閣自高寒。清梵雲間出。幽泉石上看。同遊皆俊彥。樽酒且盤桓。陪任憲副遊麻源第三谷。

霜臺先生老詞伯。攜我同上蓬萊宮。寒巖古樹棲一鶴。石竇飛泉垂兩虹。山中日月可不老。洞口桃花常自紅。神仙有無何足說。獨立滄江懷魯公。

次楊郎中叔瓚分賦陸墟別業

文筆峯前湖水西。幽棲地僻少輪蹄。花間穉子坐垂釣。竹外老翁行灌畦。酒熟漫拚金谷飲。詩成先許錦箋題。已聞孫笋如蓬賤。更說雕胡似掌齊。

小瀛洲爲思軒內翰題

金鯉池邊結草堂。畫闌干外卽滄浪。花枝照眼錦雲亂。竹影滿庭蒼雪涼。罨畫湖山常對酒。芙蓉窗戶漫焚香。由來翰苑非人境。何必求仙問渺茫。

秦旦一首

旦字永孚。夔弟。

春日言志

今日一何好。園林競芳菲。好風從東來。飄飄吹我衣。持此一壺酒。對景斟酌之。願言且爲樂。沒後非所知。悠悠柴桑翁。千載同襟期。

惠山留宿璫上人房

寺古門常掩。僧貧飯每遲。石林刊米字。塵壁掩唐詩。曲徑松杉老。荒庭橘柚垂。九龍山色好。相對一支頤。

秦喪二首

爽字仲孚。旦弟。有滌煩亭稿。

靜志居詩話。仲孚爲修敬封公季子。封公暴中心痛。仲孚刺血於胸。和酒飲之。母殷恭人膝傷。吮之而愈。郡縣上其事。詔旌其門曰孝子。秦陵卽昨。賜以冠帶。嘗作溪山清興堂。清遠閣。結亭於後園。顏曰滌煩。九日詩云。抱病忽聞佳節至。獨攜藜杖強登臨。黃花笑我容還瘦。綠酒盈樽手自斟。處處辭集知社燕。家家悲杵送秋音。不堪覽鏡頭如雪。折得好枝嬾去簪。次日得疾不起。其詩較父兄別裁體格。頗有清疎之氣。

雨窗閒賦

茅屋松窗小隱家。一灣流水抱門斜。後園昨夜多風雨。零落海棠無數花。

寫畫贈鎬姪

雨餘溪水漫溶溶。綠樹陰中繫短篷。一曲滄浪人不見。釣絲輕颺白蘋風。

陳焯一首

焯字文厚。閩人。有棲雲集。

九月八日值雨

五日十日天氣清。故故重九陰雲生。隣家貰得一壺酒。恐負明朝花下行。

陳桂一首

桂字文用。煒弟。成化戊戌進士。除監察御史。出爲浙江按察僉事。有留餘稿。

題畫

老樹懸崖葉半秋。草亭三面枕寒流。釣船歸去斜陽沒。惟有青山對白鷗。

樊阜八首

阜字時登。縉雲人。成化戊子舉人。官延平訓導。

田按時登集樊氏詩爲樊山集。乞吳匏菴序。今不見傳本。余閱曹石倉歷代詩選。有樊氏摘稿一卷。時登最爲傑出。五言如夕陽雨外明。溪上山色好。棗花落靡靡。一犬護柴關。七言如夕陽半落山迴影。塞驢一老尋詩還。人家三兩溪南村。桃李成行門對門。石門晴雪落松響。沙鳥寒雲壓竹低。半簾暝色松杉靜。一筍春香笋蕨肥。山迴薄暝牛歸後。江變新寒雁過時。廚煙著樹添風翠。野水歸塘亂瀑聲。暝色催人詩欲就。一聲沙鳥半溪雲。橋西有客耽詩癖。買徧青山種白雲。皆佳句也。

靈峯嶺道中

嶺路青林杪。盤迴出亂雲。寺樓當隴見。野碓隔溪聞。屐潤苔花積。衣香藥草熏。崖陰仙洞在。遙見鹿麋羣。
登觀音閣和前韻

維摩高閣起層層。駐馬空門試一登。雙嶂濕雲寒閣雨。半巖枯樹倒懸藤。鶴行松逕迎來客。猿坐蒲團伴病僧。浮世茫茫如夢幻。甯須弔古淚沾膺。

醉中到白厓而歸

往事無憑一夢空。悠悠岐路任西東。菊花向晚應嫌雨。梧葉經秋不耐風。自笑長貧仍作客。誰憐多病欲成翁。青山斷處孤城在。一片砧聲夕照中。

山中作

西風吹雨收。竹屋雲陰散。老鶴劃然鳴。月上青山半。

春日偶成

硯池香沁墨雲乾。酒醒無情嬾著冠。燕子歸遲春欲盡。落花吹雨小樓寒。

寒夜

破屋難禁深夜雨。布衾寒濕半窗雲。愁來自起推窗看。人比梅花瘦幾分。

過村家

細沙村路繞山斜。澗水西頭一兩家。桑柘葉乾鳩雨歇。茅檐索索響縑車。

題東坡墨竹

赤壁歸來燕寢香。夢騎玄鶴過三湘。玉簫喚醒月初墮。雲影滿簾秋氣涼。

樊昌一首

昌字友菊。縉雲人。有友菊詩。

送別次韻

匹馬對尊酒。送君歸潁川。暮雲深戀樹。春草遠連天。故國幾千里。他鄉一兩年。何時復相見。去住各潸然。

樊鐸一首

鐸字伯廣。縉雲人。有畏齋存稿。

菱道驛遇姚子卿

岸柳依依白日斜。新巢語燕野人家。舊時姚合題詩興。次第春風數落花。

莫藏一首

藏字用行。海鹽人。有素軒、佩觿二集。

張甯方洲集。莫藏作墨花。清潤可喜。

檣李詩。莫用行工詩文。及真草篆隸諸體。繡古印章。繪花木蟲魚水仙。皆可愛。送鄭東谷之廣東詩。津頭貰酒桐花落。馬首看山荔子垂。可稱警句。

秋日書懷寄崔總戎

河橋一別柳初垂。又見黃花滿故籬。落日江樓王粲賦。秋風茅屋杜陵詩。關山遠望天連樹。歲月無情髮欲絲。見說東南烽火靜。轅門可是晏眠時。

莫遯一首

遯字用嘉藏弟。

過故人舊居

幽居寂寂掩柴扉。碧草荒煙鎖翠微。前度故人何處住。舊家燕子傍誰飛。鳥鳴深院傷瑤瑟。花落空階護薜衣。回首不堪嗟往事。夕陽門外曳筇歸。

吳鎡五首

鎡詩綜誤作鎡今據吳氏傳家集正之字希聲歙人有月溪集十五卷。

田按希聲編吳氏世集自唐左臺御史少微始至明止月溪詩亦清爽。

春暮溪行

旬月坐岑寂。溪邊偶杖藜。雨來雲又合。春去鳥空啼。生草綠平野。落花紅滿蹊。無人知我意。寓景自成題。

題畫四首

舟泊烏石灘。人家白沙埠。春歸人未歸。離情滿芳杜。潒盡千尋碧。山青一髮微。詩翁機已息。何事鳥驚飛。詩思入秋清。嵐光翠如黛。屋在青山中。人歸白雲外。

花老已辭春。林陰似交夏。埽石坐看雲。鷗來伴清暇。

吳元鑑一首

元鑑字希明。鑽弟。有醉漁集五卷。

題菊潭姪畫

近山崢嶸何嵯峨。遠山淡淡如雲拖。嵐光過雨自飛動。直下寒潭生白波。石橋橋北林邊路。有客攜琴向何處。人家籬落如桃源。一夜東風花滿樹。絕愛阿咸筆力優。意匠不下顧虎頭。吟對斯圖想吳越。放舟便欲湖中遊。

吳信二首

信字思復。吳人。有柚莊稿。山居雜詠。

寄李守恭

月上梅梢瘦影斜。黃昏曾記到君家。板橋曲徑孤邨裏。茅屋疏籬淺水涯。石鼎細香焚柏子。瓦瓶新釀出松花。別來只訝春風夢。重到無由歲月賒。

山中述異

禹穴蛟人冰雪軀。水晶絡臂錦襦褌。昨朝忽見南湖市。來賣一雙明月珠。

吳敏三首

敏字思德。信弟。

田按思德兄思復號柚莊。有柚莊詩稿。詩綜誤以柚莊作思德號。據席垚湖山鑑秀集正之。

九月八日直河微雨

風煙淒其暗洲渚。明日重陽今日雨。牀頭綠酒惜空尊。籬下黃花恨無主。犬吠雞鳴近直河。楚州東去路無多。川原曠莽青山少。無處登高可奈何。

漳秋竹枝歌

金線鋪前河水深。河流如帶草如鍼。居民多在鋪邊住。椿樹重重高十尋。

答翁明德

輕橈搖曳白鷗羣。載酒看山每共君。夢斷具區煙雨裏。荷花菱葉自紛紛。

